

ASO TOFI, 19 IANUARI 2023

Na nofoia e le Fofoga Fetalai le Nofoa i le itula e 9:28 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono.

Ua faamua le tatou faafetai i le Atua i leni taeao ona o Lana tausiga alofa i lo outou soifua ma so matou ola, o lea ua tatou fesilafai ua le o le ū manava ma le fusialo, a o Lona matagofie ma vavega ua la faia mo le tatou Palemene aemaise o si o tatou atunuu. Ua faafofoga ma faalogologo le tatou Maota i le taeao nei i mala falenatura ua aafia ai nisi o atunuu tuaoi o le tatou itulagi nei, a o le agaga fafetai i lo tatou Atua ua la faataumamao puapuaga ma si o tatou atunuu. Viia le Alii i mea silisili ua la faia mo i tatou.

Ou te faatalofa atu ai i leni taeao fou i le paia o le tatou Maota, o sa foi e le avefa, i le afio o lau Afioga i le Sui Palemia, afifio o Afioga i Minisita o le Kapeneta ma Minisita Lagolago, lau Afioga i le Sui Taitai o le Itu Agai ma sui usufono uma o le Palemene, taeao manuia i lo outou lagi e mama ma le soifua matagofie.

Ua tatou le mafuta ma le Afioga i le Tamaitai Palemia ona o mafuaaga e le toe tau faailoaina, aemaise foi o nisi o sui usufono ona o gasegase ma tuatuaagia le maalofia, ia manatua ane i a outou tatalo. Se aso tatou toe fesilafai, a o le viiga e foi ma tumau atu i le Atua.

E faatalofa atu foi i le faafofoga tapuai mai a le tatou atunuu, malo afua ailao ua maua, faamalo le soifua manuia.

Le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, faamalo le faamalolosi mai i leni taeao.

Le faaauauina o le tatou galuega i leni aso, na o se tautaulaemau a le Nofoa, e tua atu le Fofoga Fetalai i le tofa ma le utaga a le tatou Maota, tatou galulue faatasi ma felagolagomai e mama ai le avega ma maua ai figota o le tatou faiva, a o se ai mo le tapuaiga a Samoa.

Ia sagai ane ai o le tai le usugafono a le Palemene i leni taeao, manuia le tapuai mai a le atunuu i Samoa nei ma so o se tafa o le lalolagi.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2022/2023 Nu.140, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.102, Teuteuga ua Fautuaina i Tulafono Tumau 2022 e tusa o le lafo na faamaonia e le Fono Aoao Faitulafono i le aso 20 Tesema 2022.

Ma le faaaloalo lau Afioga.

TULAFONO TAU FAAOFI O LE FAATATAUINA O TUPE FAAOPOPO (NU.1) 2022/2023 – felafolafoaiga faaauau i luga o le faitauga faalua – Aso 3

FOFOGA FETALAI: E tolopo felafolafoaiga i le aso Fono ananafi ua maea saunoa le sui usufono mo Aana Alofi 1.

Ia o le avanoa leni mo se isi sui usufono mamalu e fia saunoa.

Ia, lea ua matau atu o lea ua fou mai le sa o le sui usufono mamalu mai Siumu. Ia, le avanoa lea i lau Afioga i le sui usufono mamalu mo Siumu.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai mo lou avanoa. O lea ou te fia faapipii foi i le faapolo ma le faasagi ua e siitia i leni taeao, aua le tatou vatapuia ma le tatou Tapaau Sili i le lagi aua se manuia o Samoa ma ona tagata, aemaise foi o leni Palemene mamalu.

Ou te faatalofa atu ai i lau Afioga i le Fofoga Fetalai i leni taeao fou, taeao matagofie i le alofa ma le agalelei o le tatou Alii Faaola.

O leni taeao ou te faatalofa atu i lau Afioga i le Sui Palemia, aemaise foi o le afifio o alii ma tamaitai Minisita o le Kapeneta.

E faatalofa atu foi i le afifio o Afioga i Minisita Lagolago. E faatalofa atu foi i le Sui Taitai, ia, ma sui usufono uma o le Vaega e Puipuia Aia Tatau a so o se tagata Samoa o lo o soifua ma papaaao i totonu o Samoa ma fafo atu foi o Samoa.

Ou te faapai atu foi i le paia o Samoa i ou sa le ave ma ou papa tuloto, e leai lava se vave e na te mafai ona toe autalaina lou fue lavelave aua o ou paia ua uma ona tuumatamaga. Le tapuaiga i lau Afioga i Le Ao Mamalu o le Malo ma le Masiofo, lau Afioga i le Sui o le Fono a Sui Tofia ma le Faletua.

Afio foi lau Afioga i le Faamasino Sili ma le mamalu o alii ma tamaitai Faamasino o le Faamasinoga, ae tainane foi le afio o lau Afioga i le Peresetene ma le mamalu o le Faamasinoga o Fanua ma Suafa.

Ou te faatalofa atu foi i le tapuaiga faifaipea a le mamalu o le Aiga Sa Levi, o feoi o le Talalelei i so o se fatafaitaulaga i totonu o si o tatou atunuu o lo o semaina se manuia mai le Atua aua Samoa ma lona Malo Tutoatasi.

Ia, o le paia lava lea i Tama ma Aiga, o Tama foi ma o latou Aiga, o le faautautaga foi i le aufueta ma le aufueloloa o Samoa. Le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O faleupolu o tofiga ma tulatoa o Aiga ma le lavaloa o Samoa i ona tulaga faalupelupeina.

Ou te faatalofa atu foi i Ofisa Sili o Pulega o Matagaluega ma Faalapotopotoga Tumaoti uma a le Malo o lo o tatou auai i lenei taeao aua foi le lagolagosua mai i galuega a le Palemene.

E faatalofa atu ai i lau Susuga i le Failautusi ma le mamalu o le Ofisa o le Fono Aoao Faitulafono i ona tulaga ma ona vaega eseese.

Malo le soifua malo le lagi e mama. Ua silasila mai lau Afioga i le Fofoga Fetalai, ia ua malilie sui usufono ia e toalua o le matou vaega ou te tamua. O lona uiga o au lea ua Taitai. Lau Afioga, ou te fia pai atu lava i si ou itumalo, le mamalu na latou filifilia ma lagolagoina ma tofia mai lou tagata faatauvaa ou te molimoli maia ma faaleo so latou finagalo i le Maota lenei o le Palemene o le Malo Tutoatasi o Samoa. O le Maota o lo o fatufatu ai ma lipoi ai upu o faigamalo.

Ia, o le paia lava lea ia Sa Asomua ma Aiga e Lua, lau fetalai Tuuu ma lo outou aiga o Sa Tuuu, le Falelua o Tulafale, le Fofoga o le Alataua, Utaileuo ma le mamalu o le Faletolu. Ae a le tapuaiga mau a le afaigaluega tofofi o feoi o le Talalelei o lo o faafalelemalu i totonu o le tatou itumalo o lo o talosia se manuia mo le tatou itumalo. Faafetai mo talosaga, malo tatalo.

Ia, o paia faataotooto na o si ou itumalo, ae tapuai maia ma le manuia, se i ou taumafai ane aua se tatou sao i le Tala Faatatau Faaopoopo o le Tupe e pei ona lauiliuina nei e le Palemene.

Lau Afioga i le Fofoga Fetalai, ua ou tulai atu ma lou faaaloalo e momoli lau faafetai i le Afioga i le Tamaitai Minisita o Tupe. Malo le tau, malo le finau. Faafetai e te le o amanaia le pola e motu i tua, aemaise o faitioga e le faavaea, o lenei e le i atoa se 2 tausaga o lau Paeaiga, a ua maitauina foi le lelei o lau faasoa, o lea foi ua e saunoa manino o lo o lava seleni e faatino ai galuega a le Malo, aemaise o le faatupeina o le tatou tai \$1miliona e pei ona tapisa ai nei. Ia, alo ane i ou faiva manaia, ua lagona foi e le usugafono le lototele i fuafuaga mo le tuuina mai o seleni mo le faatinoina o poloketi a itumalo taitasi. Faafetai faamalo. Ma ou te fiasia e faasilasila atu, ua talia ma le fiasia e lenei itumalo le Tala Faatatau Faaopoopo o le Tupe 2022/2023 e pei ona opea nei i le Maota.

Lau Afioga i le Fofoga Fetalai, e tele lava ni mea sa fia talanoa i ai, a ua maea ona saunoa i ai nisi o sui usufono. Ua manino foi tali na tuuina mai i Afioga i alii Minisita, o le a le toe tele lava nisi manatu, ae i ai lava si vaega lea lau Afioga ou te fia talanoa i ai, o le vaega lea i a tatou avanoa faasikolasipi. Ou te talitonu lau Afioga, e fitoitonu i le Afioga i le Tamaitai Palemia nei vaega, ae ua ou maua pea le tele o faitioga a nisi o matua i lea tausaga ma lea tausaga. O faitioga o lo o faapea mai nisi o matua o a latou fanau na ausia maka e talafeagai ma se avanoa faasikolasipi, ae peitai e leai. O nisi o tamaiti e talitonu i latou e le ausia maka e maua ai se avanoa ae o lo o maua a latou sikolasipi.

O se tuualalo lau Afioga i le Palemia e tauala atu i lau Afioga i le Sui Palemia, se i silasila totoa ane lava pe moni ia faitioga, ae po o amiotonu foi le faatinoga e i latou o lo o nafa ma nei vaega. Se i silasila totoa ane i ai po o ai o latou faia nei aga le talafeagai i le mamalu o le atunuu, aemaise o fanau ia e le o maua avanoa e tatau ona o ai.

Se i toe silasila ane lau Afioga i faiga faavae i le tulaga lea o le agavaa o fanau ia e tai lua sitiseni, sitiseni Niu Sila Samoa, sitiseni Ausetalia Samoa, o le dual citizenship. Sa i ai le manatu o nei avanoa faasikolasipi sa tatau ona agavaa i ai na o nai fanau ia e umia sitiseni Samoa. Ua ou maua i sailiiliga o le tamaitiiti e i ai lona sitiseni Niu Sila, afai e aoga i Niu Sila pe na o le \$700 Niu Sila le pepa. Afai la e fai ana pepa e 4 i le semester, o lona uiga e na o le \$2,800 e totogi i le semester a tamaiti ia e maua sitiseni. A o nai fanau ia mai Samoa e avatu e matua faaaoga i Niu Sila, e \$4,000 Niu Sila le pepa. Afai foi la e 4 ana pepa i le semester, o lona uiga, e \$16,000 e totogi.

Lau Afioga i le Fofoga Fetalai, e fai lava si eseese ma le tele o le tulaga e pei ona tulai mai. A o avanoa nei e tuuina mai e Niu Sila ma Ausetalia e avatu ai nai a tatou fanau. O le mafuaaga lea o lo o taumafai ai foi tatou e adopt i o tatou aiga i fafo avanoa ia ina ia maua ai avanoa faigofie, aemaise lava o aoga, e maua ai aoga lelei, aemaise foi o mea o tulaga o le soifua maloloina.

Ia, o lona e tele lava le faamama-avega ia i latou e i ai sitiseni Niu Sila ma Ausetalia, ae mamafatu le avega ia i latou e na o le sitiseni Samoa.

Lau Afioga i le Fofoga Fetalai, ia e tauala atu i le Afioga i le Sui Palemia se i e silasila totoa ane i lea vaega aemaise o ni faiga faavae ia faataoto i se tulaga tonu ma le talafeagai. Ou te faafetai foi i le faigamalo, faafetai ina ua toe faatulaga mai le tatou Komisi e Pulea Tagata Faigaluega a le Malo. Sa i ai lava le popolega o le a faapeapea atu ai lava ma leai se PSC. O le faafetai lea. O lea ua toe faatulai mai le Komisi i lona tulaga e tatau, ma sa tatau ona tumau ai.

Ia faafetai foi i le Komisi i la latou galuega fita, faafetai o lea ua vavave mai tofiga ma filifiliga o Ofisa Sili o Pulega o Matagaluega. Ae ou te le malamalama pe aisea na faatuai mai ai nei tofiga.

Ou te lagolagoina foi le review pei ona fuafuaina, ona e le faigofie le tau faatulagaina o auunaga eseese i totonu o Matagaluega taitasi.

Lau Afioga i le Fofoga Fetalai, na pau na o nai mataupu ou te fia talanoa ai. Ona ou oo mai lea i manaoga o si ou itumalo, e le o ni mea fou. O mea sa ou taua i lau lauga faataupou. O le auala galue o le matou nuu i Saaga ma le auala e agai i tai i le aai.

Lau Afioga i le Minisita o Galuega Tetele a le Malo, ia ua ta fia faalogo atu lava i sou finagalo, po o afea ae po o le fea foi o galuega o le a faamuamua mai. Ae toe faamanatu atu foi le tatou auala lea e amata atu i Tanugamanono e tau lava i Siumu. Ua tele lava le faatonu, ae talitonu po o afea le taimi e uma ai galuega foi ia o tender. Ae lelei foi ae vave faailoa mai po o afea, o lea foi ua oo i lenei vaitau o timuga ua tele ai lava le afaina o le tele o auala. Ia ma lou faaloalo.

Ia avea ia lenei avanoa ou te momoli atu ai le faamalo ma le faafetai a lenei itumalo aemaise o le matou nuu i Saaga e tusa ai foi ma le afio atu o lau Afioga i le Fofoga Fetalai e fai ma sui o le Malo i le faamanatuina o le 60 tausaga o le tutoatasi o si o tatou atunuu. Faafetai tele, faamalo i lau Afioga ua maualuga ma matagofie ai lea aso i lou afio atu. Faafetai.

Ia, o lea ou te le o vaai atu o nofoia le nofoa o le Afioga i le sui usufono mo Anoamaa 1, e pei ona saunoa lau Afioga i le aso ananafi, ia tasi lenei o sui usufono e lava le tofamamao ma le faautautaga poto e tausia ai aiga, nuu, itumalo aemaise o Ekalesia.

Ia faafetai Lufilufi pe a o e faafogafoga mai, o lea ua e maua tonu mai le mea lea matou te i ai, ua aiulu tuanai taisi. Ua galo le tele o tausaga sa mafuta ma galulue faatasi ai. Sa i ai le manatu e alu alu suaga o le vaatele faapea mai, tuu ia nai o matou uso e o ma le manuia, ae leai ua na o le faatauemu mai i lo matou taumafai atu e finauina lau aiatatau, o la'u aiatatau, aiatatau a sui usufono uma o le Palemene lenei, aemaise o le tau faasa'oina o mea sese

FOFOGA FETALAI: Ia, ou te fesoasoani atu i lau Afioga i le sui usufono mamalu, talu ai ona o tulaga ia o la e ua i le Faamasinoga, ou te fautua atu foi i lau Afioga i le sui usufono mamalu, ia o lea ua maea tapena ia mea uma ma tulaga uma, a o lea ua maua lou finagalo. Ia ona o tatou Tulafono Tumau lava, a oo loa tatou mataupu i le Faamasinoga, e le mafai ona tatou toe pa'i i ai.

Ma le agaga faaloalo.

Tofa Hon TUUU ANASHI LEOTA: Ia faafetai i lau Afioga.

Afioga Sulamanaia Fetaiai Tauiliili Tuivasa (Vaimauga 1): Lau Afioga i le Fofoga Fetalai pe maua se avanoa faamolemole?

Tofa Hon TUUU ANASII LEOTA: Lau Afioga na ona ou taumafai atu lava i vaega ia leaga o lea sa tulai mai le sui usufono ananafi ma pei e faifai mai i le matou Vaega. O nai vaega ia ou te fia pa'i i ai, ae ou te le toe oo la i vaega ia pei ona...

FOFOGA FETALAI: E i ai foi le manatu lau Afioga i le sui usufono mamalu o le taeao fou lenei ma le aso fou lenei, ia tatou maua pea le filemu o le Atua aua le tatou fefaasoai ina ia sao ma uli le galuega i lenei aso. O le fautuaga a le Nofoa ma le agaga faaaloalo.

Se i tulai mai le sui usufono lea. O se mataupu e faafilemu ai le Maota po o se mataupu foi e...

Afioga Sulamanaia Fetaiai Tauiliili Tuivasa: Ioe, o le 82 lava lea ta te talanoa atu ai i le Tulafono Tumau e fia faamalamalama.

FOFOGA FETALAI: Ou te le o manao e tau mai fua le numera o le Tulafono Tumau. O le fesili po o se mea e filemu ai le Maota po o se mea e...?

Afioga Sulamanaia Fetaiai Tauiliili Tuivasa: E filemu ai lau Afioga.

FOFOGA FETALAI: Ia saunoa mai.

Afioga Sulamanaia Fetaiai Tauiliili Tuivasa: E faatalofa atu i le paia o lenei Fonousu i lau Afioga i le Fofoga Fetalai aemaise foi o lenei Itu i le paia o le Kapeneta ma Minisita Lagolago faapea foi sui usufono mamalu o le...

O le saunoaga a le sui usufono i lenei taeao, pei o le agaga lenei o lea e tulai atu ai, e pei ua faatuatuanai latou. E pei o le popolega lenei, lea foi fai mai ua aiulu tuanai taisi. E le o se finagalo o le Vaega Faaupufai lenei po o se sui usufono, o le latou lava loto faitalia, lea na faamavae lava latou e o e fai le latou faamoemoe lea.

E pei o le agaga lenei e tau avatu ai le agaga leaga o lea e pei o le a tuuaiina nisi, pe tuuaiina foi i ina i le Fofoga Fetalai po o lenei Itu po o matou, e leai. O lana ia lava saolotoga na fai ai lana filifiliga.

E pei o le agaga lenei ona e pei o lea o le a tuuaiina nisi aemaise o le Nofoa lenei, ae leai o le latou lava faaiuga na faamavae ai. Ma lou faaaloalo lau Afioga i le Fofoga Fetalai.

FOFOGA FETALAI: Ia, o lea ua maua atu lou finagalo. Lea ua lelei, ua maua atu lou finagalo. Masalo pe na e maua mai le agaga o le Nofoa lea na taumafai atu ai. Ia, a silasila mamao ma tuutumamao le tofa, o lea ua tataua ona maua mai le agaga o le Nofoa, o lea ua uma ona tuuina atu ia

mataupu. Ua i ai foi le fautuaga a le Nofoa, ia tatou aloalosa ma ia vaega o lea ua uma ona faatino ia mea. Le sui usufono mamalu mai Siumu, ia o lea ua e maua mai le agaga o le Nofoa, aua tatou te toe tepa i tua, o lea ua tatou agaigai i luma mo le lumanai, ma tatou tatalo pea i le Atua mo lana fesoasoani e maua ai le filemu ma le toafimalie.

O le fautuaga lea a le Nofoa. Ma le faaaloalo.

Tofa Hon TUUU ANASII LEOTA: Ia, faafeai i lau Afioga i le Fofoga Fetalai, o au ou te ava tele i lau Afioga aemaise foi o le mamalu o nofoa o le Palemene. E le faigofie foi lou taumafai e faatonutonu le tatou galuega, ma e tatau foi ia i matou o e matutua ona fai ma faataitaiga. Ae pei lava ona ou taumafai atu lau Afioga o lea na faifai mai ma aumai upu e matou te o e toe fai le matou palota. E lagona lava le faanoanoa i ai... e le o se mea foi lea e tausua i ai. Ua matou lagona foi lau Afioga le matou o i le Faamasinoga. Ae le la pea se aso, e i ai foi aso e timu ai. E le o se faaiuga faigofie foi lau Afioga ua matou faia. Sa laualuga i lou tagata lou manatu i lou itumalo, e le fia magoto faatasi i se vaa ua mamaioa mamaitaloa. Ua ou tu i luga ma ou saili le amiotonu ma ia mafai ona ou faaleoina se finagalo o lou itumalo, e aunoa ma le aiaina e se tagata po o se Vaega Faaupufai.

Afioga Sulamanaia Fetaiai Tauilili Tuivasa: Faamolemole lava pe maua se avanoa.

FOFOGA FETALAI: Ou te le iloa le mea lea e te taumafai mai ai le sui usufono lea.

Afioga Sulamanaia Fetaiai Tauilili Tuivasa: O saunoaga lava nei o lea e fai mai, o se vaa e goto atu, leaga o lea matou te i ai i totonu o le Vaega Faaupufai lea.

FOFOGA FETALAI: Ma e le o oe foi o se Taitai o le Itu Agai o lea e nofo mai le Sui Taitai.

Afioga Sulamanaia Fetaiai Tauilili Tuivasa: O le sui lava o le vaega lenei.

FOFOGA FETALAI: Onosia mai, onosai mai. Ua tauau foi ina sopo le tatou taeao ma felafolafoaiga. Ou te le iloa po o le a se mea mamafa e ala ai ona e tulai mai. O lea sei faaauau pea le saunoaga o lea lava e faafofoga mai le sui usufono o Siumu, o lea ou te paipai malie atu lava, ae alofa ia le sui o Siumu, o lea ua i tatou i le taeao lenei, tatou maua pea le toamalie. O lea ua maua mea uma, o lena foi ua tatala atu le avanoa ia outou afioga i el

faamasinoga, e ave uma i ai mea na e te tau saunoa mai ai, ae ia maua le toamalie o le Maota, ia maua le filemu. Ma le agaga faaaloalo.

Tofa Hon Lauofo Fonotoe Nuafesili Pierre Lauofo: Lau Afioga i le fofoga Fetalai,

FOFOGA FETALAI: Se i tulai mai lau afioga i le Sui Taitai.

Tofa Hon Lauofo Fonotoe Nuafesili Pierre Lauofo: O lea ou te tulai atu, o lea lava sa nofonofu pea ma faalogologo atu i le saunoaga matagofie a le sui usufono. Sa musu lava e faalavelave, se i tau matau po o fea e agai i ai. Ae o lea e sao le sui o Vaimauga lea e tulai mai, ona o le mafuaaga lenei, o le mataupu la ua i le faamasinoga e pei ona saunoa lau afioga e ala lea i le motion a le Afioga Fofoga Fetalai, o lona uiga o lea ua aafia ai lau afioga. A o saunoaga la e agai mai, e pei ua sau i le lautele, ua aafia iinei, aafia lau afioga i le Nofoa, e puipui i le mamalu i le tulaga e i ai le tatou fonu. Ae o lea ou te tau matau, ona o lau faalogo e pei e foliga mai ua salamo le sui i lana faaiuga ua fai. I lau lea faalogologo, o le mafuaaga foi lea na tuai ai ona ou tulai atu i luga, e pei e foliga mai ua salamo, ae o lea e maua le avanoa. Ae toe fia foi mai, ia o le tatou aiga lava lenei, e le tusiesea lau afioga i le sui mamalu, o lea e maua le avanoa.

Tofa Hon TUUU ANASII LEOTA: Lau Afioga i le Fofoga Fetalai, onosai mai, faamolemole lau afioga, o mea la ia sa ou fia oo i ai, a o lea ua tulai mai le Sui Taitai.

FOFOGA FETALAI: Malie se i tulai mai lau afioga i le Minisita. Onosai mai se i tulai mai le Minisita o Galuega Tetele.

Tofa Hon Olo Fiti Afoa Vaai: (Matagaluega o Galuega, Felauaiga ma Atinae Eeseese): Faafetai i lau afioga mo le avanoa, e malie lava le faalogologo foi i le saunoaga a le Taitai o le Peatolu. A matau mai lene itu, e tele foi ia faitioga a lea itu ia matou Minisita, e olo lava le fua. E matou te iloa lelei lava le tulaga o le aiatatau faasui-usufono e faaalua ai ona finagalo i totonu o le Maota lenei. O le faataitaga lea e avatu i i, ua leva foi ona ou fai atu i ina, e ao ona tatou oloolopitovaa le faiga o le tatou galuega. Ia maua pea le onosai i lau afioga i le Sui Taitai o le Itu Agai, tuu pea le saunoaga, o la lava tou te faafofoga mai lava, e tuu lava saunoaga a lenei itu, e faitalia i latou po o a mea e lau mai ia i matou o Minisita. O le tulai atu lea, o lea e vaai atu o le a toe pisa foi. Ou te le malamalama ia outou afioga pe o le mea ea sa outou mafaufau lelei i le tatou lotu lea na fai nei i le taeao. ae uma lava tou tauaimisa. O outou maua mai?

Tofa Lauofo Fonotoe Nuafesili Pierre Lauofo: Faafetai lau afioga i le Fofoga Fetalai, o le agaga na ou tulai atu ai, e leai e puupuu lava si mataupu. O lea ua maua atu, faafetai i le Minisita, o lea e maua atu le sese tele o lau mataupu lea e te agai mai i ai. silasila o la e saunoa le sui usufono, o la la e avanoa matou e faauilavea, tulaga masani o le Tulafono Tumau. Ae a faafofoga lelei i tualumaga o le Fono, o le afioga i le Fofoga Fetalai lea e taofia le sui usufono. Se i faafofoga lelei i le tatou Fono.

FOFOGA FETALAI: Atonu o lea ua tulai mai le sui mamalu o Siumu, ia tatou logosaia foi le taumafai mai o le sui o Siumu, e pei ona saunoa foi le Minisita, ona e i ai foi nai tuuaiga faapeana taua foi faapea o le vaega a Amigo. E i ai foi le agaga faapena, ia tatou tau fai lagona, e tatau foi ona i ai se avanoa e faailoa mai ai, o le uiga lena, e le o taua le faamasinoga, ae o nai uiga ma tala, na fai i totonu o le Maota, o le uiga lena. Leaga o le tatou Maota ma ona Tulafono Tumau, e le talia ia upu faauigalua, tou te malamalama i ia mea ua lava lo outou silafia. O lea foi la e taumafai mai ia Tuuu ia, leaga o lea na i ai nai lafoga. A ia outou lavapapale ma outou malilie, se i faauma pea le avanoa o Siumu, o lea foi ua ou faailoa i ai tulaga uma, aua nei toe oo i nisi mea, a o nai mea o lea sa lotea e le Maota ma nai upu ia, se tau teuteu mai, ia outou lavapapale ma onosai. Tulai mai le sui usufono mo Siumu e faaauau lau saunoaga.

Tofa Hon TUUU ANASII LEOTA: Fafetai i lau afioga i le Fofoga Fetalai, faamalulu atu pe a faapea ua taulagalaga finagalo, ae o le saunoaga a le Sui Taitai faapea ua ou salamo pe ua matou salamo, e leai se tulaga faapena lau afioga. E leai lava, ma e matou te o e saili lava le mea moni i i, pe oo lava i fea pe fai le faamasinoga pe o e fai le palota e fai lava. Lau afioga i le Fofoga Fetalai, o mea ia o lea e...matou te tau saili lava, ia le amiotonu ma ia faaleoina finagalo o itumalo, e aunoa ma le aiaina e se tagata, po o se Vaega Faaupufai. O le teuteuga o lenei tulafono lau afioga, ua taotaomia ai ia aiatatau o tatou sui mamalu i nei teuteuga. E pei ona taumafai atu lau afioga, o nei lava mea o le tau finauina o le mea moni, ma o le a taumafai lava i se malosia e gata mai ai. E leai lava sau upu na ou tafaaleagaina ai se Vaega Faaupufai po o sona sui usufono mamalu, e leai lava i lea vaega. Ae ua ou manatu o se siosiomaga ua ou lagona ua le saogalemua mo au. Na ala ona ou tulai ese ou te le fia mai, ou te fia malosia pea e tautua lou itumalo. Ou te fia i ai i se mafutaga e lagona ai le mafana, mafutaga loto mauualalo, ae le o le faalogo i upu faifai ma le faasausili.

Lau afioga i le Fofoga Fetalai, e i ai lava se tasi o faaiuga o le faamasinoga, lea na faamanatu mai ai se vaega taua i lalo o le faavae, o le aiatatau faale-faavae a se sui usufono a so o se tagata soifua Samoa.

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai, faanoi atu ma le faaaloalo.

FOFOGA FETALAI: Se i saunoa lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: O lea lava ou te tau matau po o fea le vaega o le Tala o le Tupe lea e agai i ai le saunoaga. Ua ou le iloa tonu pe o ni tupe tau... e leai foi ni tupe tau faamasinoga, e le o malamalama i le sui po o fea o agai i ai. Ae aumaia lau faatoesega, ia ma toe foi mai lea, e leai lava se mea, aua o lea sa e tuuaia au, fai mai o au lea na mafua ai. Ae leai se isi o taofia oe e fai lau galuega. O lena e te silafia e oe ia, ave le tuualalo ma e talanoa i le tulaga e pei ona i ai i mea o atugalulu i ai lou finagalo. E leaga o lea e fia faagasolo le tatou, aso Faraile lenei, o taeao le aso puupuu, ae ua fia faagasolo le tatou galuega faamolemole.

FOFOGA FETALAI: O le galuega faasolo lava ma le taumafaiga, o le avanoa foi ua tuu atu i le sui mamalu, faasoa mai ona lagona. Se i tulai mai lau afioga i le Minisita o Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Ioe, e fia fesoasoani atu lava, o le faamoemoe lena o le tatou Malo e faasolo le tatou galuega. ae matau atu ua toalia faafa ea le lauga a Siumu i lenei taeao ona o le tele o faalavelave oso faafuasei. I lau matau e fesoasoani atu, o la e sagatonu lava le lauga a Siumu. Ua lua aso o le tatou fonu o fai upu faifai, o lea ou te taofi. Lau afioga o lea e maua mai i lou finagalo, e le taugofie. Lo outou sa seetolu, sa o matou nonofo i ina. O le saunoaga a le Fofoga Fetalai i lena taimi, ua sao o outou finagalo, you are now free, o le upu lena.

Ae fautua atu i le Taitai o le Itu Agai, soia ia le toe tauanauina Siumu ma Faleata, o la ua saoloto i latou. Aua le toe faalavelave, tuu e fai le mea la ua latou finagalo i ai. O si au fesoasoani atu lea, ae faauma maia le saunoaga Siumu.

FOFOGA FETALAI: Atonu o lea lava ua tele fesoasoani Siumu, o lea lava ua maua ou lagona, ae talitonu o la ua faatali mai le isi avanoa tele mo outou i le faamasinoga. Ae faauma maia le saunoaga lau afioga i le sui usufono mamalu.

Tofa Hon TUUU ANASII LEOTA: Faafetai tele i lau afioga i le Fofoga Fetalai, e pei lava ona ou taua, ou te faaaloalo tele i lau afioga i le Nofoa o le tatou Palemene. Ai o galo i le Sui Taitai le mafuaaga ua mafai ai ona ou tautala, ona o le faifai mai. O i lea ou te auala atu ai le Sui Taitai, pe afai e le o galo ia oe. Ae o le a ou usitai i lau afioga. E tele lava mea e

fia faaalu atu i lenei taimi manu o maua le avanoa, ae ua ou manatu tele i lau afioga.

Lau Afioga i le Fofoga Fetalai, ou te fautuaina pe o se tuualalo ma lou faaaloalo, se taimi e talafeagai ai pe a tusa ai ma lou finagalo o lau afioga ma le faigamalo, ia toe teuteuina lenei tulafono i le Tulafono Tumau, le Tulafono o Faigapalota aemaise le Faavae, ma nisi uma tulafono na faanatinati ona teuteuina i totonu o Paeaiga ia ua tuanai atu.

Lau Afioga i le Fofoga Fetalai, e pei o lau afioga lava o lo o i ai le pule, afai lava o le a sou finagalo ae tatou agai loa e teuteu le vaega lea ua aafia ai nei i matou, ua lelei tele, ae lafo atu.

Lau afioga ma le mamalu o le Maota, aemaise o le faafofoga ai a Samoa i se upu ua sala po o se lafoga ua paopapa, ia alofa lafoai i nuu le aina. E potu lava le tautai, ae sese lana atu i ama. Faafetai tele lau afioga i le fofoga Fetalai mo lou avanoa. Ia faamanuia le Atua i lau afioga, faamanuia foi i le Palemene nei, faamanuia foi i le Palemene nei, faamanuia i le tapuaiga a lou itumalo aemaise o Samoa. Manuia le Fono.

FOFOGA FETALAI: Ia malo saunoa i lau afioga i le sui usufono o Siumu, o oe o se tasi o sui matua o le Maota, e talitonu foi, ua lava le tofa ma le faautautaga, aemaise o le lagolago mai i le tatou galuega. Malo faafetai ua e logosaia foi se fautuaga a le Nofoa, ia tatou silasila i le agai i luma. Po o le a le tulaga e i ai. O lea foi ua oo mai lau fautuaga i le Malo, e faapena lava ona faatino ia mea uma, e amanaia lava le saunoaga a le sui mamalu. Ae taua foi le itu lea na e taua i sikolasipi, e manaia tele ae faapepa lelei ma vaavaai ni mau lelei po o le a ni tulaga o lo o i ai, ona tuuina atu lea i le ofisa o sikolasipi le ofisa o le Palemia, e aoga e taua, leaga o lea ua faalauaitele i totonu o le tatou Maota, a o lea ua i ai nai matua o mafatia, e aoga foi lena e fesoasoani. E lelei lava le faapepa ma tuuina atu i le Ofisa o sikolasipi ma le ofisa o le Palemia. Ma le agaga faaaloalo, faafetai.

O lea ua matau atu o lea ua fou mai le sa o Sagaga 1, lau afioga i le sui usufono mamalu.

Afioga Hon LOAU SOLAMALEMALO KENETI SIO (Sagaga 1): O paia o le taeao ma le aso, aua le Fonousu a si o tatou atunuu. O paia foi o le Maota i Tiafau nei, afio lau Afioga i le Fofoga Fetalai, o lena foi talanao i le afio mai o le sui Palemia, le mamalu foi o le Aiga Kapeneta, aemaise foi o le afifio o Minisita Lagolago. Ia ua malumaunu foi le tiasa i le matau atu o lea ua sootuli foe i Ofisa Sili o Pulega o Matagaluega a le Malo, aemaise foi o Faalapotopotoga Tumaoti, i le latou tapuaiga mau foi aua le Fonousu i lenei taeao. E faapena lenei tala na atoa i le afio atu a le Sui Taitai, aemaise foi o sui usufono o lenei vaega o lo o faapena ona agaia le Malo.

Ou te tulai foi ma le ava tele, ma le faaaloalo, e fia faaleo foi se lagona a o se motugaafa foi e matimati ai lo tatou sa aua foi le tatou folauga i lenei Tala Faatatau o le tupe. O lea ua matau e le o toe umi foi se taimi, pe a ma le toe 6 masina. O lea ua potu moli i futiafu e paepaeulufanua le faamoemoe, aua le Tala Faatatau Faaopoopo o le Tupe e faapena ona faaauau ai galue a lo tatou Malo, e i ai le agaga ia faapena ona faaauau i lona atoaga. O le mea lea alu afioga i le Fofoga Fetalai, ua maua le avanoa faaauau i lenei taeao, e matau foi ma le toto, i aso e lua ua faapena ona mou atu, ia felafolafoaiga foi, fetuunaiga muniao ma fefulisai faalau mamafa le tofa ma le uta, o le aua lava o le faamoemoe ia faapena ona sao i alo le faamoemoe o lo tatou atunuu, aua lona sa.

O paia la ma sa ma faiga ia taoto, o lea foi ua matau ua uma ona paepaeulufanua le tootoo o Siumu i lenei taeao. E faafetai atu i alu fetalai Tuu. O paia masani o la e i aao o Tumua ma Pule aua foi le tapuaiga a Aiga ma Tama, o Tama ma Aiga, le Usoga a Tumua ma Pule.

Le faafofogaaga foi a nai tatou uso tuaoi, le la foi motu i Sasae, i le latou foi tapuaiga leleoa aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, ae tainane foi le Laau na amotasi, Faatui ma Tootoo Faletauaitu ma le Faletautagata ma le mamalu ia te oe le Manuatele. O tapuaiga ia e faapena ona faaleo i lenei taeao, tainane le faafofogaaga a si o tatou atunuu, i Le Ao Mamalu o le Malo ma lana masiofo ma le loaloa o le tatou atunuu, i tulatoa ma tulatofia aemaise lava le aufaitatalo, e o lo o faapena ona faanonomanu aua se manuia o si o tatou atunuu. O lupefaalele, o auauna tofofi aua le manuia e i la latou tapuaiga.

O le tala lea alu afioga i le Fofoga Fetalai e fia faaleo ai se lagona. E matau foi ma le toto i aso e lua ua tuana'i i le tele foi o finagalo ua faaalua, aua le Tala Faaopoopo o le Tupe. O finagalo e faapena ona matimati ai le sa o lo tatou atunuu. E tetele lava i Pesega ae matua lava i le o o. Avatu aumai, o le aua lava e tasi, ia sao ma uli le sa o Samoa i lana folauga. O le agaga foi lenei i lenei taeao i lou tulai atu ma le ava tele lau Afioga. E matau lava ma le toto i saunoaga, i le tele o mea ua faapena ona faaalua, e ese le taua. O motugaafa foi, e palepalealalo ai lo tatou faamoemoe, aua se lelei o Samoa mo a taeao. E matau foi nisi o taimi e faaosofia foi moeagaluaga, i finagalo foi pe a faapea foi ua tetele atu lenei itu. Ae ou te manatu, e aoga, fautuaga foi a lenei Itu e tuu atu, ia o lenei e i ina le pule, o lenei e i ina le tofa ma le uta e fetuunai ai muniao. A lelei ia faaoga, ae a faapea e le talafeagai ma so outou finagalo, ia vaatele o la e i ai nuu le aina e lafo i ai.

A o le agaga o le tootoo o Sagaga 1 i lenei taeao, ia tatou galulue faatasi, avatu se matou motugaafa fetuunai muniao i lenei itu, ona faapena lea ona folau ai lo tatou sa.

E muamua ona ou faafetai atu i le aiga Kapeneta ma lau Afioga i le Sui Palemia ma lenei Itu. O le upu moni lava lea tou te saunoa i le tele o taimi,

e le i atoa se 2 tausaga o la outou galuega. Ae ou te manatu foi e le faigofie, leaga sa o matou saofafai ai foi i ina, e tele naua tiute ma faiva e le faigofie si o tatou atunuu aua e utiuti le faaso. Faafetai i lau Afioga i le Tamaitai Minisita o Tupe, lea foi e faitau i lau faaso, e le o aafia uma Matagaluega i lau faaso. Ae ui i lea o lena e i ina le uta ma le tofa.

Ou te fia fesoasoani atu foi i nisi o itu e lagolago ai foi la outou galuega. O lea ua matauina foi, ma ou te lalago foi i ai, ma ave i ai le 100% pe a faapea ua oo i ai le tofalaiga foi i ai a le Kapeneta ia le review lea e faapena ona toe fetuunai ai ma toe tilotilo i ai. O a tatou totogi, o tagata faigaluega, e pei e faapena lena silasila totoa i ai, aemaise lava o tatou tagata faigaluega ia maua galuega e faatino ai manaoga o lea aiga ma lea aiga, lea afioaga ma lea afioaga ma lea ekalesia ma lea ekalesi.

Oo mai se tala i le Ofisa o Aoga, lau Afioga i le Minisita fafetai, faafetai mo le auaunaga. E ui ina tele foi faafitauli, ia e le masino faafitauli. Ae ua agai se faamatalaga e lalago ai nisi foi o fautuaga ma saunoaga foi e agai lava i le faatinoina ina ia faapena ona tino lea auaunaga o le Matagaluega. Sa ou i ina sa ou galue ai, o lo o faatino le polokalame lea mo le toe aoaoina o faiaoga e faapena ona faatino galuega, aoga faataitai. Ou te alu atu e le o toe faia le polokalame i le tatou Iunivesite, ona ou fesili lea pe mafua i se a? Ae o le tali ua le a'ua'u le afaigaluega latou te faatinoina le galuega ma ua le toe faia ai le polokalame. Ae ui i lea, sa fetuunai i lou taimi ma taunuu ai i le faaiuga e toe faaauau le polokame, ona e silafia e le Iunivesite e taua tele le aotauina o faiaoga latou te aoaoina aoga faataitai, e taua tele. O le mea la lea ua maunoina ma ua faapena foi ona fai i ai suesuega, o lea ua iu mai tatou faiaoga o aoga faataitai ma latou faailoga degree, paga lea ua le mafai ona faaigaluega. Ona ou toe fesili lea pe mafua i se a? Ua ou tatalo atu i lau Afioga i le Minisita ina ia toe silasila i ai i lea tulaga, o le taua ia o le vaega lea o le aotauina o alo ma fanau o si o tatou atunuu mai le age group lea, one, two, three years old. O i ina e atagia ai ma ua i ai faamaumauga maumaututu ia atunuu atamamai ma popoto o latou tagata, o i le fatu, o so o se atunuu atiae, o alo ma fanau. E tatalo atu i lau afioga i le Minisita, toe silasila ane i ai. O lea ua uma ona faatulafonoina, na ou lauga ai foi, i le 4 tausaga, ua faatulafonoina ua tataua ona alu i totonu o le faleaoga ma aotauina ia alo ma fanau ua tai fa tausaga. O i la i le level lea o aoga faataitai, aepeitai e le o i ai ni faiaoga o totogi e lo tatou Malo e aoaoina ia alo ma fanau ia. O le ala lea e tatalo atu ai i lau Afioga, afai ua le a'ua'u i le paketi o le Tala Faaopopo, ia o le tatou main budget lea tatou te tilotilo i ai, aua le agai i luma i le tausaga fou, e tuu ane i ina i ou tafatafa, ina ia totogi a tatou faiaoga o aoga faataitai e pei ona i ai ma faatulafonoina e lo tatou Malo. O le taua ia o le vaega lea ua faapena ona ou tatalo atu ai. E le gata i lea o isi avanoa e pei ona silafia foi, e tasi lea faafitauli o le Matagaluega, o le le lava o faiaoga. E le lava faiaoga e tagi mai ala foi ma taumafai, aemaise lava nuu i tua. O le faafitauli foi sa

ou i ai, taumafai e fofo, fetuunai, ou te iloa foi o lena ua nafa ma lau afioga. Ou te iloa o le auga lava lea e tasi, se i silasila ane i totogi o tatou faiaoga.

Na taua foi e nisi o saunoaga, ia faiaoga o aoga a ekalesia, o lea foi ua tali le Minisita, ma aumai le latou fetuunaiga, ia o lena e i ina le tofa. A totogi le faiaoga a ekalesi, o se mea taua tele aua le agai i luma o si o tato atunuu.

Ia faafetai i lau afioga i le Minisita o le Soifua Maloloina. O lea foi e matau i lau taumafai foi i lenei tasi ma le afa tausaga ua faapena ona outou pale mai ai, ia malo galue. E tele ina e saunoa o tatou nei o le Palemene e tatau ona fai ma tatou agai i gauta e silasila i le maota gasegase, sao lelei lau afioga. E taua, aua o le tala faalogo lava le toatele o tatou, ae leai lava nisi e o i gauta.

O au foi e masani ona ou asiasi i ai. O le falemai nifo, se i e silasila ane lava i ai. Ou nofonofo lava i tua e faatalitali foi lau pepa, e ta le fitu ua matou i ai, ae ta le iva faatoa... ua lagona le leo o Rama i le toatele o gasegase sa i ai i lena foi aso. Utiuti le potu o lo o faapena ona faatalitali ai gasegase, ae le ma faitaulia le toatele o tagata ua leaga o latou oloa, se i silasila ane lau afioga po o talafeagai le nofoaga o lo o faapena ona faatino ai le galuega lea. O le fomai mata e faapena foi, le mamalu o si o tatou atunuu o faatalitali le fomai.

Lau afioga i le Sui Palemia, ia faafetai i le tala malamalama i le aso ananafi foi ma tuu mai lou finagalo, aua foi ni fesili a o ni foliga vaaia foi ua tuu atu ai sa matou fautuaga. O lea ua fai le review e lagolago i le tulaga e pei ona e saunoa i ai.

Lau Afioaga i le Minisita o Faatoaga faafetai foi, aua foi lou taumafai. O lea ua tatou matauina i lenei vaitau ua ese suiga, ua taugata le soifuaga aua le agai i luma. O lea e matau ia outou faiga faavae le agai i tua aua le toe lalagaina o le vao ma tua i si o tatou atunuu. O le mea lelei i la matou lea matau. O le poloketi foi ua tele e na sausaunoa ai, ia aua ia, aua foi e te tau le pua ma lafo mai i lenei itu faapea o le le lalago. Ioe lau Afioaga i le Minisita, ia tatou galulue faatasi. A ua i ai foi ni mea o faapena ona felapeai ai ma fesouaina ai la matou galuega e lalago atu, ia atonu na o nai mea itiiti e le tele naua. A o le faasafua nei tei ua lagona le leo faapea o ai ua faapito i ai manu ona avea lea ma auala e fetuatuanai ai. O si o matou foi itumalo o lo o olo a le fua ma faatalitali mai aua foi ia galuega ua faapena ona faataoto a matou fuafuaga, a o lo o talia lupe o maunu aua foi se taimi e tauunu atu ai le fesoasoani e pei ona i ai le poloketi, a o lo o lalago lava i mea o lo o faapena ona manatu ai lena itu i faiga faavae aua lenei poloketi ia tino mai ma manuia. O la'u maitau i le poloketi, e matua manuia si o tatou atunuu pe a fai faalelei. E inaina foi le Minisita i nisi o taimi ma ana saunoaga, atonu o lona foi lea agaga ina ia faapena ona vave ona tino mai. O lea ua toe lima i le ono masina lea e totoe o le Tala o le Tupe lea e i ai nei, a o lea e le i faapena ona faasafua. O la matou tatalo,

tatala le avanoa e faapena ona faatino ai ma faaauau ai matou poloketi lau afioga.

Ou te nofonofa a ma maitau i lena foi itu i le saofaiga, ou te matau a ma le alofa, tasi, lua, tolu, fa, e toa-5 le Aiga Kapeneta e le o auai le fonotaga. Atonu o lo o malaga foi i malaga i atunuu mamao i ni fonotaga, a o lea ou te maitau o lo o faapena foi ona apulusia tofaga ma le falaefu i le afioga i le Tamaitai Palemia o lo o siigasegase. O le taimi o matou galulue ma le Tamaitai Palemia, tulou foi le Maota nei, ou te le i iloa se aso ua siigasegase ai i fafo, a ua ese lenei vaitaimi i la'u matau o lea e le i atoa se lua tausaga ae pei ua faalima faaono ona siigasegase le afioga i le Tamaitai Palemia. Sole se se i vaai ane po o tou amio ua gasegase ai. E mamafa le galuega

Afioga Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai...

FOFOGA FETALAI: Malie le sui usufono mamalu o Sagaga, ia, leaga o lea ua e oo i le tulaga o gasegase, ia tulai maia lau afioga i le Minisita o le Soifua Maloloina.

Afioga Valasi Luapitofanua Toogamaga Tafito Selesele: Faafetai. Ou te faaaloalo tele i le Toetaufanua vaeatu le... o le Toetaufanua foi o se tagata e tasi lea tofa e malu ai le Maota. O lou tulai atu e faamanino a nai vala ia e fesiligia e le sui usufono, o le ma talanoaga ma le Tamaitai Palemia ina ua taumafai e ave i fafo, o la'u vaai e sili le vave i lo o le faataamilo. Mo lou silafia lau afioga i le sui usufono o le molimau a le Afioga i le Palemia ia te a'u, na taoto lona tua i le 5 tausaga talu ai o lona uiga o la outou Nofoaiga. O le ala lea o lo'u fai atu, se aumai faamatalaga sa'o, aua o le Minisita o le Soifua Maloloina na o mea sasao a. O le ala lea o lou tulai atu e faasao o la e faafofoga mai le Tamaitai Palemia. Talofa e. O la'u tatalo i ai ia manuia, ia e toe faaolatia mai i le manuia. Pau o le mea ia lua o ma le Atua ia lua toe omai ma le Atua.

Lau afioga la i le Fofoga Fetalai, o le faamalamalamaga lena, o le toe siakiina o lana taotoga i le lima tausaga. Ou te iloa o amio a le Toetaufanua na taoto ai le Palemia. Ae ou te le tuuaiina la o ni amio, ia po o le Sui Taitai aua sa lelei lava le la kegi ma le Palemia. O le ala lea o lou tulai atu ne i meaane ua feseetai tatou. Ma ia aua nei galo, e faamanatu atu i le tatou Maota, o le pule a le Atua i lou soifua ma le ola, e sekone lava. E minoi lava, aua e le iloa pe te lauga nei ae te i ua faatopetope a o le uiga o le faamatalaga, leai o le taotoga sa fai a le Palemia i le lima tausaga talu ai lea ua toe siaki ma toe asiasi i ai. Ua ou tuua i ai fomai faapitoa ia toe soifua ia alualu ai pea ana nofoaiga nei seia oo i le faavavau. Ia o le tala atu lea lau afioga, ae aua tou te matemate, taliltonu i le Atua ma faatuatua ia toe foi soifua manuia mai le tatou Palemia. Ia manuia le Maota.

FOFOGA FETALAI: Mo le faasaoina o le taimi o le Toetaufanua, se i tulai mai lau afioga i le Minisita o Faatoaga.

Susuga Hon Laauli Leuatea Polataivao Fosi: Lau Afioga i le Fofoga fetalai, ua ou maitau ua faitau lelei e le afioga i le sui usufono Minisita e le o aafia i le tatou Fono, ioe. O le agaga lava ia lea ua saunoa atu le afioga i le Minisita o le Soifua Maloloina o le tatou te o uma i ai pe a tupu se faaletonu, ioe. E fai foi la o lo outou silasila mai... O le mea tautino lava, o lea ua saunoa e le faigofie le galuega Loau. E le i faigofie lo matou taunuu mai o le Malo filifilia fou e omai e tauave le faigamalo fou. O lena e te silafia. Afai la e te silasila mai ua alu ma toalia le sa o le Kapeneta, o le amoga ma le faafafa lena lea e amo i le taimi lenei. Silasila i le Minisita o le miliona, a lea e oo mai lava i le taeao lenei, o lea e fai a tatou finauga aumai avatu, a lena e manaia lau faatolotolo, ia usitai i ai Peseta ma Leaana ia ma Sula, ia ona manaia loa laia. O la e nofonofo lelei lava Lufilufi e leai ma sana upu aua ua see lelei lana poloketi, nofonofo lelei Lenatai, lena foi e te nofonofo. O lena lava e agatonu lava lau... Ae pau a lea o lau tuualalo, leaga tatou te talosia. E tatou te talanoa faaataata lafoga ae pei ona saunoa le Minisita o Falemai tatou te le iloa le ituaso o le tagata. O lena foi e le o saofai mai le afioga i le Saofetalai ia Sala? Ia, e faapena. O lea foi na sau a saunoaga ua totogi tupe a le Malo e ave ai gasegase a Minisita i fafo. E tuu i fea? O ai e ave i ai le faamuamua? Ave i e o lo o galulue, 24 itula 7 aso o le vaiaso a o le toatele lava lea e eva i le laufaumalu e leai a se galuega tele o faia. E i ai foi nisi na gasegase i lena nofoaiga talu ai nei, le nofoa lena e nofo mai ai le afioga i le Laaunafausia ia Aiono, o le a le tatou mea na fai? Na mai loa le uso ave, fano mai ai lona soifua ma maliu ai i o. E faapena le tatou galuega. Ona tatou te faaupu pei e faaataata a lafoga, a o le tatou talosia, tatou talosia a tatou siiga gasegase aua e le iloa po o ai o tatou e alu taeao. A o le agaga lena Loau, talai ane ia Peseta ma Leaana ma Sula faamanaia o latou itumalo i le tatou... Ma le agaga faaaloalo.

FOFOGA FETALAI: Ua i ai le manatu o le Nofoa lau afioga i le Toetaufanua se i fai atu pea se tala a le Nofoa leaga o lea ua... Masalo a outou faafogafoga mai i le taeao nei i tatou tatalo faapitoa e talosia ai faatafagasegase o nisi o le tatou Maota. E i ai foi le manatu o le Nofoa, e pei e faatalasua saunoaga ae le logo lelei i le Nofoa ma le faafogafoga mai o le atunuu. Ia o le mea lea, e i ai a le manatu o lea ua tuu i le Atua faatafagasegase o i latou e aofia ai foi le tama ia Sala, ia o le agaga lena. Ia tatou lagona faatasi le tatou taulaga ma le tatou tatalo i le Atua ina ia alofagia a latou sailiga togafiti ia ma... Onosai mai le sui usufono lea, onosai mai se i fai atu le tala a le Nofoa. Ia ma le isi mea o loo manino lava

i tatou Tulafono Tumau aua nei faalualuagia ni a tatou saunoaga i totonu o le Maota aua a tau le faa-5 ona sii gasegase e le moni ia upu ma ia tala.

Ae ou te fautua atu ma le agaga faaaloalo i sui mamalu o le Maota ua manino le tatou Tulafono Tumau ia tatou talanoa i mea manino ma mea lelei ma mea e mamalu aua lava le Fono Aoao Faitulafono.

O le agaga lena o le Nofoa lea ua ou tatalo atu ai ma ou te le toe talia foi nisi lauga mai i le taimi lenei i ia mea ae tatou faamoemoe i le Atua lea ua uma ona ave la tatou talosaga i le Atua mo i latou o e ua gasegase. E moni lava a outou saunoaga e leai a se isi o tatou e malosi pea lava pea a o le silafaga a le Atua ma le tatou tautoga ia e faapena. Ia tatou lagona ifo ma le lotou maualalo tatou talosaga molia.

Ua i ai lo'u manatu...

Afioga Peseta Vaifou Tevagaena (Faasaleleaga 5): Lau afioga i le Fofoga Fetalai, e faamalulu atu i lau afioga leaga lea ua taua lenei itumalo...

FOFOGA FETALAI: Ia o lape a o lauga a o lea le mea a ia e leai se mea matuia tele. Ia se i saunoa mai lau afioga.

Afioga Peseta Vaifou Tevagaena: Ia o sina mea e fia faamalamalama lau afioga ona o lea sa faafofoga foi lenei Maota i le taimi foi sa lauga ai lenei itumalo, sa tatalo lava i le Atua mo le siiga gasegase foi a le Tamaitai Palemia. O le Tamaitai Palemia e malosi. Talu foi ona matou galulue iinei e le o se tagata e... Ou te lagona o le Tamaitai Palemia o lo o maua pea le soifua laulelei, e moni lava foi i le siakiina, ae ou te lagona e i ai le mea la e mamafa i lona mafaufau, o le \$1miliona lava lea ou te lagona o lea e pei e faalotolotolua faapea le Tamaitai Palemia. A o lo o manuia lava le Tamaitai Palemia lau Afioga.

FOFOGA FETALAI: Ia, ou te fautuaina le sui usufono, e le mafai ona e assume ina le finagalo o le isi tagata. Ia tatou nofouta lelei i na mea, e eseese lava tofa a tagata mai le Atua. O le mea lea aua tatou te faitaua ia mea.

Lau afioga i le Toetaufanua faauma mai le saunoaga.

Afioga Hon LOAU SOLAMALEMALO KENETI SIO: Faafetai atu i lau afioga i le Fofoga Fetalai. A outou matau lelei i au tala sa fai ma... e leai lava ma se uiga alualua o i ai po o i ai foi se uiga e faatama lau afioga i le Fofoga Fetalai ae taua o lea foi ua tulai mai le afioga i le Minisita. E pei lava ona ou fai atu ua leva ona matou galulue ma le afioga i le Tamaitai Palemia. Afai la aua ou te le iloa le taimi na siimai ai, ia, e le afaina lea ae pei o la'u lea matau ua tele a tatou fonotaga foi e le o auai. O le tatou Tala o le Tupe Faatatau foi i le tausaga lea, e le i auai mai foi le afioga i le

Tamaitai Palemia ona o le tulaga foi lea ona o la e gasegase. E ui o lea, e le o faapena ua ou faapea atu a mea ua gasegase lena itu a o lea ou te iloa ma ou mautinoa e mamafa le galuega leaga sa ou galue ai. E le faigofie. Ioe. Ae a faaopoopo la i ai ma amio a Olo ma Laauli, ua atili ai la ona mamafa i le afioga a le Tamaitai Palemia le galuega. E ui o lea e leai o motugaafa, a o le galuega ou te talitonu ma ou mautinoa e le faigofie la outou galuega, e mamafa tu le galuega.

Ia, o le a seu i fanua lau afioga. Faafetai i lau afioga i le Tamaitai Palemia ma le tala foi faafetai i Matagaluega. Atonu o le atoatoa o le Tala o le Tupe Autu o le 2023/2024 atonu o le a faatino ai ia tulaga e pei ona ou fautua atu lau afioga i le Minisita o Aoga, silasila totoa i le tulaga lea aua faiaoga o aoga faataitai ina ia totogi e le tatou Malo. O la ua iu mai uta i le Iunivesite ma ua uma foi ona aotauina a o la ua le mautonu po o fea ole a agai ai. A o degree ia ua ou mautinoa ma aumai le tala mai uta i le Iunivesite e mafai ona latou aotauina le yr1 , yr2 and yr3 i le infant. Vaai ifo avanoa pe afai e le o lava faiaoga le a le mea e le faaoga atu ai faiaoga ia ua faapena ona aotauina i le aoga faataitai e faatalitali ai faiaoga primary level pe a faapea e le o lava i le taimi lenei.

Ia o le a seu i fanua lau afioga. Ou te fia faafetai foi i le tapuaiga a si o'u itumalo aua le matou itumalo o Fogaa, o Aele, o Nu'u ia ma Tafaigata, ioe. O le matou itumalo le isi itumalo o lo o faapena ona autovaa atu ai le tele o le tatou atunuu o lo o faapena ona alaala i ai ma papaaao ai tupu ma ee o tulatoa foi ma tulatofia, ia masalo e oo atu i le isi 5 tausaga ia ua faatumulia le itumalo. E ui i lea se i silasila ane lau afioga i le Minisita o Aoga i le tatou aoga foi lea i Tafaigata, lea ua uma ona taatia ou te alue ese toe a ona fai o le kolisi ma le primary tuufaatasi ai i ina ina ia aua nei toe alu ese alu atu a i le aoga faataitai, primary level, kolisi, i le nofoaga lava e tasi i Tafaigata la e sa taatia, masalo o lena e silafia e lau afioga. O lea na talosaga atu e faaauau e le o se poloketi a le itumalo o le poloketi a le tatou Malo, ona o le mamalu o le atunuu a outou toe silasila nei i Tafaigata i le taimi lenei ua ese fuafuaga la ua i ai ua faatumulia i tupu ma ee o si o tatou atunuu o faapena ona papaaao ma alaala ai, e faapena foi Nu'u. Ae o lo o faapena ona matou feutagai aua le aotauina o nai alo ma fanau foi i nai na foi tamalii o si o tatou atunuu o lo o papaaao ma alaala ai.

Ona faauma lea o se tala lau afioga i le Fofoga Fetalai. Faafetai foi mo lou faafoefoaina o la tatou Fono. E i ai foi le taimi ou te matau atu ai e pei ua vave ona e toatamai ma vave foi lou ita. Aua e te popona fua i tala a le aualii ia, ioe. O le tofa a lau afioga o le tofa e faafoefoe ai le tatou fonotaga aua le Fonousu a si o tatou atunuu. Ia manuia le Kapeneta manuia lena itu aua outou faiva alofilima foi, o outou na e i ai le uta aua si o tatou Malo ia ia sao ma uli le folauga ae ola le sui usufono mai Fogaa. Ma le agaga faaloalo.

FOFOGA FETALAI: Malo faafetai, malo le tofa i lau afioga i le sui usufono mamalu po o lau afioga foi i le Toetaufanua. O lea ua faafogafoga foi ma le totoa i le fautuaga malu ua tuuina mai i le Maota aemaise foi o le Matagaluega o Aoga faafogoga mai a le Minisita ma le Matagaluega o lea foi sa e galue ai, o lea foi ua faasoa mai lou finagalo ma le faalaeiau ma le faalototele aua lava le agai i luma o le tatou Matagaluega o Aoga aemaise foi o Matagaluega a le Malo. E faalototele foi i le Kapeneta. O le mea lea, malo saunoa faafetai foi mo le sao mo tatou felafolafoaiga o le tatou Tala Faaopoopo o le Tupe.

O lea ua tatou oo tonu mai i le tatou taimi o le malologa o le taeao, ia, e le o toe toatele foi ni tatou sui. Ae i ai le manatu se i toe foi mai foi ma taliu mai le tatou malologa ona faaauau foi lea o nisi o sui usufono o le tatou Maota.

O le mea lea, o le a faataatiaese le tatou Galuega mo malologa masani o le taeao.

Na faataatiaese Taulumaga a le Fono Aoaofa Fautulafono mo lana malologa masani i le itula e 10:46. i le taeao ma toe faaauau i le itula e 11:28 i le taeao.

Na toe faaauau felafolafoaiga i luga o le Tulafono Tau Faaofi o le Faatatauina o Tupe Faaopoopo (Nu.1) 2022/2023.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Fautulafono.

E i ai le manatu ua maea paleauau le taligasua a le paia o le Palemene, ou te talitonu foi ua faaosofia foi moegaluga i se faasiligamalosi e foefoe ai le tatou galuega. Malo le onosai i le tatou Maota.

E faataatiaese tatou Taulumaga mo le malologa o le taeao ua maea le saunoaga a le sui usufono mo Sagaga 1.

Ia, o le avanoa lenei mo se isi sui usufono mamalu e fia saunoa.

Ia, pei lava na muamua mai le moli a Aleipata Itupa i Lalo, le sui usufono tamaitai ia o lou avanoa.

Afioga FAAGASEALII SAPOA FEAGIAI (Sui Usufono Tamaitai – Aleipata Itupa i Lalo): Ia malo faafetai i lau Afioga i le Fofoga Fetalai e tusa ai foi ma le avanoa. Atonu foi o lea ua matu i fau le tautega ma le faasiligamalosi i lenei itula o le aso. E momoli atu ai le faafetai ia i latou na tapenaina ma saunia nei taumafa mo i tatou, faamanuia le Atua.

Ia, o lenei itula, ou te muai faatalofa atu i lau Afioga i le Fofoga Fetalai, malo le soifua, ua vaaia lava le alualu i luma o lou lalelei, o ou foliga ataata,

e tiga lava ona sousou le vasa ma fememeai lou ausoo, a o lo o mau lava le iufoe aua le faafoefoeina o le tatou fonotaga. Malo faafetai.

Ou te faatalofa atu foi i le afio o le Afioga i le Sui Palemia, o Minisita faapea le mamalu o le Kapeneta. Atonu foi tatou te le o mafuta ma le Taitai o le tatou atunuu le Afioga i le Palemia, ae momoli atu le faatalofa. Ia malo le soifua maua ma le lagi e mama i lau Afioga.

E faatalofa atu foi i le Sui Taitai o lenei Itu aemaise le mamalu o le au usufono. E faatalofa atu foi i Ofisa Sili o Pulega o Matagaluega a le Malo, o Pisinisi ma Galuega Tumaoti. E faatalofa atu foi i le Afioga i le Faamasino Sili, aemaise o i latou uma ua mafai ona aofia i lenei aso.

E le faagaloina foi le tapuaiga a Le Ao Mamalu o le Malo ma le Masiofo o lo o tui mai pea le mulipapaga aua le alofaiva o le tatou Palemene i fonotaga i lenei vaiaso.

Ou te faatalofa foi i lou itumalo o Aleipata o lo o faafofoga mai i lenei itula, i le susu o susuga i faafeagaiga i so o se fatafaitaulaga. I le afio o le Afioga i le Tuiatua Faanofonofu, paia ia Alaalamalae, le Tane o le Itu ma Alii o le Itu, Pule na Taitai i Tumua i le Lalovi ma le Laulala, ia ma le mamalu ia te oe Saleaamua. Malo le soifua. E faatalofa atu i lenei itula o le aso.

Ia ou te faatalofa atu, o ai lava o maua mai lou leo i lenei itula i Samoa nei aemaise o atunuu mamao, i le Suafa pele o Iesu Keriso ou te faatalofa atu ai i lenei itula, talofa, talofa lava.

Ia, a o lenei itula atonu lau Afioga i le Fofoga Fetalai, o le a tuusao loa se manatu o lenei itu e ala ai foi o le tulai atu i lenei itula o le aso.

Ia e muamua lava ona ou avatu le faafetai i lau Afioga i le Minisita o Galuega Tetele a le Malo, lau Afioga Olo e tusa ai foi ma le taligalu matagofie ua pei lava o lou lalelei le aulelei o le taligalu. Ua le uma le o ane o fafine o le matou itumalo nofonofu ai i luga ma tautau lou suafa.

FOFOGA FETALAI: Malie le sui usufono mamalu se i tulai mai le Afioga i le Minisita leaga o lea ua e taua lona lalelei.

Tofa Hon Olo Fiti Afoa Vaai: Lau Afioga i le Fofoga Fetalai, e fia fesili atu lava i lau Afioga i le sui usufono mamalu, e toafia ni tamaitai na fesili ia au?

Afioga FAAGASEALII SAPOA FEAGIAI: E leai ni tamaitai na o fafine lava ia na o. E momoli atu le faafetai tele lava i lau Afioga e tusa ai foi mo lou amanaiaina o le talosaga atu a lenei itumalo. Ia ae pau lava le talosaga e tuuina atu pea i ou autafa e pei ona molia muamua atu i lau Afioga, ia o matou auala galue lava lea o lo o tuitui atu ai i lau Afioga. E toe tolu lava nai nuu o le matou itumalo, aemaise o le nuu lea na sua lona auala i le taimi tonu lava o le matou palota. E ui lava na o maua ma si ou

tuagane le ma palota, a o lea na alu atu ai lava le masini tele lava. Ia sua le auala o le nuu lea ma taatia ai lava e le o faatina. Ia pau lava lena o le naunautaiga o lou nei sui usufono, a lava le alu atu o le masini tau lava ina sua agai i uta, ae se i faata i se isi taimi lau Afioga.

FOFOGA FETALAI: Malie le sui usufono mamalu, se i tulai mai lau Afioga i le Minisita o Galuega, ona o lea ua taua le Minisita o Galuega.

Tofa Hon Ofo Fiti Afoa Vaai: Lau Afioga i le Fofoga Fetalai, e manaia lava le agiagi foi a le Afioga i le tamaitai sui usufono, ae ua toe faaletonu mai lava i i i le masini lea sa alu atu o fai le la palota.

Ae lau Afioga i le Fofoga Fetalai ma le mamalu o le Maota, o galuega na sa faasolo mai le Paeaiga tuai lena sa ou sau faaauau atu.

FOFOGA FETALAI: Ia, faaauau mai le saunoaga a le sui usufono mamalu.

Afioga FAAGASEALII SAPOA FEAGIAI: Ia leai, o le a ou see ese ma lea itu, o lo o silasila le Atua i lea tulaga. Ae o i ai foi le talosaga e tuuina atu i lau Afioga, ona se i e silasila ane lava i konekarate o lo o faatinoina le fonofonoina se i tulou o omoomo o le auala, ona o lau taavale la e i tua ua tae le tioata. Na o le o atu lava asu palapala i omo, alu atu le timu ua taape solo. Ia ua ta le iloa po o fea a ta ui ai, ua sao ai le faafafine foi lele, alu i luma omo, sau i tua omo, alu i autafa o iliili, ia ua masau atu le taavale ua tae ai le tioata faamolemole.

FOFOGA FETALAI: Malie le sui usufono mamalu se i tulai mai le Afioga i le Minisita.

Tofa Hon Olo Fiti Afoa Vaai: Lau Afioga, e ese le matuia o lea faafafine. Lau Afioga i le Fofoga Fetalai, ou te faamalulu atu i le Afioga i le tamaitai sui usufono. E sao, i le taimi lenei i timuga, e le mafai ona faatino ai se faata foi lea, leaga o lo o feagai tatou ma timuga. O lena la e avatu ai nai fesoasoani foi na e tau tanu ai nai pu na o auala se i tulou le Maota ma le faafogafoga a le atunuu, ae oo loa i le tatou mugala, ona alu atu loa lea o le faata pe toe reseal atoa se vaega o le auala o lo o faaleagaina.

FOFOGA FETALAI: Malo. Ia, saunoa le sui usufono mamalu.

Afioga FAAGASEALII SAPOA FEAGIAI: Faafetai mo le matupalapala ua toina mai i lenei itula. Ia o le a see ese ma lea itu. A o le isi talosaga, toe tasi lava le talosaga e tuuina atu i lau Afioga, ona e i ai le

vai lea i Eva, ona o le vai lea ua fai ma faafitauli i le matou faaitu. O nuu uma lava ia ma itumalo o lo o malaga atu ai, o le vai lenei ua fai ma faafitauli ia i matou ma faafefefefe ia i matou i taimi o timuga. A oo ina tafe le vai lea, e toe foi mai lava matou taavale matou taamilo i Tiavi, nai aiga foi ia o lo o fia o e tulituli faalavelave ia ma fia mafuta foi i aiga i taimi e leaga ai le tau ma oo mai ai mala faalenatura.

O lea e tuuina atu ai i ou autafa i lau Afioga i le Minisita, se i e silasila ifo i ai i lea tulaga.

FOFOGA FETALAI: Ia, e lelei lava le fai ma tali atu le Minisita e vave ai foi lau mataupu. Se i tulai mai lau Afioga i le Minisita.

Tofa Hon Olo Fiti Afoa Vaai: Faafetai lava i lau Afioga i le Fofoga Fetalai mo le avanoa. E ala ona ou toe tulai i luga e faauilavea i le lauga a le tamaitai sui usufono, e to lou pulou i le Afioga i le tamaitai sui usufono, o le taimi tele lava ma umi lea sa ou i ai i totonu o le Palemene, na ou vaai ai i le auala lea. Ae leai ma se sui usufono o le itu Anoamaa ma le Itu lea na laga le mataupu lea i totonu o le Palemene. E oo i le Sui Taitai, e nofo tonu lava i i, e le i laga.

Faafetai atu i lau Afioga i le tamaitai sui usufono ua e laga, o le taua ia o le vai lea aua la le mamalu o le tatou atunuu mai le pito lea, ae le i ano i ai Alaiasa ma Lauofo. E pei o le faamalamalamaga lena. O lea ua faafofoga mai le matou Pulega, e sao lelei, o i ina e ave i ai le faamuamua i le itu lea, a o talia la le galuega foi lea ua uma ona faamaonia ma maua le tatou fund e fai atu ai le auala lea i le itu i sasae. O se taimi ou talanoa i ai i le vaega lena, ae faafetai tele lava i lau Afioga i le tamaitai sui usufono i lou amanaia mai foi o isi sui usufono ia e i luma mai ma itumalo. Faafetai.

FOFOGA FETALAI: Ia, malo faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia, se i saunoa lau Afioga i le Sui Taitai. O lo o taua lou suafa?

Tofa Hon Lauofo Fonotoe Nuafesili Pierre Lauofo: O lea e taua lou itumalo.

FOFOGA FETALAI: E a ua lagona ai lou le fiafia?

Tofa Hon Lauofo Fonotoe Nuafesili Pierre Lauofo: Ua matuai ou faanoanoa. Ioe. Ua faanoanoa ua tau aafia foi ma lou fatu.

O le auala sima lea e pei ona taua, o le ford, lea e i le afoaga o Eva i totonu o lou itumalo, e sao. E saolele lava le saunoaga a le Afioga i le tamaitai sui usufono. Ma e talu lava ona ou ulufale mai i le Maota lenei, o lau lava lea pese tumau. O lea ua ou toe manatua, pei lava o le Paeaiga lea na amata i le 2006 sa ma i ai ma lou uso a sui usufono Anoamaa 1 i le Komiti o Tupe. Na avatu ai lea o le vaegatupe e faaaga e sii ai i luga le ford lea. Ae peitai, na maea lenei tausaga faletupe ma le Paeaiga, e leai lava ma se mea e faia, ia ai foi ua toe sui fuafuaga a le faigamalo ma le Matagaluega sa i ai. E faapena lava la le faasolo mai le tele o tausaga, aua e le natia lea mea e silafia uma lava e tagata aemaise o le mamalu o le atunuu o papaaao i Atua.

O ananafi o lea sa ma i le malologa o le tatou Maota, na ma inuti ma le Afioga i le Minisita. O lea la sa ou toe faamanatu i ai, ona saunoa mai lea ananafi, ua lelei o lea o le a fai. Ae ua faateia au i le afea i le saunoaga a le tamaitai sui usufono, a o le tali lenei lau Afioga i le sui usufono, ua saunoa mai le Minisita o le a fai le tatou auala lea, o le a sii i luga.

Ia pei o le fesoasoani atu lenei i le mataupu lau Afioga. O upu moni lava upu ia e avatu e le o se tala e avane ai.

FOFOGA FETALAI: Faafetai. O le mea sili lava o lea ua...

Afioga Alaiasa Moefaauouo Malagaitutogiai Sepulona Moananu (Anoamaa 1): Lau Afioga i le Fofoga Fetalai...

FOFOGA FETALAI: Ia leaga o lea ua taua foi le sui usufono mo Anoamaa 1.

Afioga Alaiasa Moefaauouo Malagaitutogiai Sepulona Moananu: E eseese lava vaavaai a tagata i faatofalaiga ma le tulaga o mea faapenei. Sa i ai si toaina sa faipule mai le matou nuu ae ou te le i oo atu, sa ou faalogo i lana lauga sa fai i i le Maota, na taua ai la le niu na falala i ina i Saoluafata, ia, e faapena ona lamatia ai femalagaaiga. Ae tulai le sui usufono o Anoamaa lea matou lea i sisifo otegia le sui usufono fai mai e leai sana feau i le Anoamaa lea ua Anoamaa 2 nei. O le mea foi la lea ou te nofonofu lava, ua leva ona ou fia lauga ai i le mataupu lea, ae ou te nofonofu lava atonu e i ai se taimi e taua ai e le sui usufono mamalu. A o sui usufono ia mai Aleipata, faalogo mai outou i le mea e fai pe a outou omai o tafe le vai, tutu lelei ma onosai, onosai lelei e fai sau tatalo ma mafuta i le Atua ona e vaai atu loa lea ua toe maui atu lava le vai e pei o le vai foi lea a Mose. Ia ma le faaaloalo. Manuia tele le tatou Fono.

FOFOGA FETALAI: Malo faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Oi, e i ai se isi mea?

Tofa Hon Lauofo Fonotoe Nuafesili Pierre Lauofo: Leai o se mea e fia faasao i le saunoaga a lou uso na se i mavae atu nei. E le o au lea na otegiaina le sui usufono lea mai lona itumalo. O le sui usufono lea sa i ai i le isi Paeaiga sa pale mai le tofi o le itumalo lea ua faipule mai ai nei lou uso. E sao sa i ai le niu sa i ina i luga, e fai si maualuga, ae le i umi na i ai, na o atu lava le afaigaluega a le Malo tuu i lalo, sa falala i luga o le auala. Ae faamalulu atu, e le o au na otegiaina le sui usufono lena a lou itumalo.

FOFOGA FETALAI: Malo lava. Faafetai foi le faasoa ma fetufaai ia se i fatufatu ai foi le finagalo o le sui usufono o lo o saunoa nei.

Ia, le avanoa lenei le sui usufono mamalu.

Afioga FAAGASEALII SAPOA FEAGIAI: Faafetai lava i lau Afioga i le Fofoga Fetalai. Ia, ou te talosagaina pe faaopoopo sou 10 minute ua fao uma e le vaega lea lota taimi faamolemole.

Ia faafetai. Leai ua ala ona ou taua le auala lea, ona o au lea ou te alu i aso uma aso uma. Atonu e le ano i ai le vaega lea, aua e seasea o i latou itumalo, a o ita lenei e ta te alu i aso uma aso uma e asi lou itumalo. Faafetai. E faafetai atu ai i lau Afioga i le Minisita, e faauma atu ai lea vaega i lau pitolaau. Faafetai mo galuega lelei.

Ia, lau Afioga i le Minisita o Faatoaga, faamalo faafetai. Faafetai mo galuega faamaite, e tusa ai foi ma lou faamaite i atinae e pei o le totoina o faatoaga aemaise o laau aina ma laau faisua, ia malo faafetai.

Na pau lava se talosaga e tuuina atu i lau Afioga, pe mafai ona faaauau pea lea tulaga i le tufatufaina atu o nai mili kapisi, o nai mili tamato i tua i itumalo se i faaoga ai foi nai Komiti la ua tofia e fai ai ni a latou galuega faamolemole.

Ia, faaii sau tautalaga i le Afioga i le Minisita o le Soifua Maloloina. Ia, atonu ua silafia uma, o le matafaioi foi lea sa ou galue ai i totonu o le soifua maloloina. Faafetai i lau Afioga aemaise o le Matagaluega e tusa ai foi ma galuega faatino i lena tausaga ua tuana'i atu. Faafetai foi sa mafai ona e asia tua i falemai i itumalo i tua i au asiasiga aua lava le saogalemu o le faatinoina o le galuega.

Ae i ai lava sina au talosaga i lau Afioga e tusa ai foi ma le matau atu i le fausiaina lea o fale apitaga mo fomai. Ae tuuina atu lau talosaga i lau Afioga e pei ona e silafia tausisoifua o lo o galulue ai, e tasi le fale i falemai uma lava e nonofo faatasi ai alii ma tamaitai tausisoifua. Ia atonu e le o se tulaga lelei lea i le tatou aganuu i le nonofo faatasi o ni alii ma ni

tamaitai, a o lea ua faalogologo atu pei na o le fale o le fomai lea o le a fausia, ae toatasi le fomai, ae toa-20 ma ona tupu tausisoifua o lo o galulue ai i totonu o falemai taitasi o itumalo.

E talosaga atu ai i lau Afioga, atonu foi o lo o alaala mai le Ofisa Sili o Pulega a le Matagaluega ina ia silasila ifo i lea itu, ina ia faaleleia uma itu, aua tatou te tilotilo pitotasi i se itu e tasi, ia tutusa uma la tatou silasila i e o lo o faatinoina le auaunaga. E tataloina foi ina ia tagai ane lau Afioga e tusa ai foi ma le toe review a le PSC, pe mafai lava ona toe tagatagai ane e faamataga ifo lava le soifua maloloina, ona pei o le auga lea ma le core lea o le galuega i totonu o le atunuu ma le tapuaaoina o outou soifua, o le soifua maloloina. Se i toe silasila ifo lava ma tagatagai i ai i ni fetuunaiga o latou ovataimi, aemaise o latou alauni, ona e le mafai ona e galue i se gasegase, e tilotilo atu ua ta lou taimi manava, e le mafai ona e tuua le gasegase e alu loa. E tatau lava ona faatino, o le a lava le umi e i ai le gasegase lea, e le mafai ona e tuua a ua leva ona ta lou taimi manava.

O le mea lea se i toe tilotilo ifo lava le PSC e auala atu i le Afioga i le Minisita, se i toe tilotilo ifo lava i lea tulaga ma nisi foi o mataupu faa-tausisoifua pei ona savalia ai lou ofisa, o lo o nonofo lava ma taputapu mai le matou Sosaiete e tusa ai foi ma ni talosaga sa tuuina mai i lau Afioga ina ia e tagatagai ifo i ai. Ae faafetai mo le auaunaga.

E faaiu sau tautalaga i lenei itula e tusa ai foi ma ni...

Susuga Hon Laauli Leuatea Polataivao Fosi: Lau Afioga i le Fofoga Fetalai mo se avanoa faamolemole.

FOFOGA FETALAI: Malie le sui usufono mamalu se i tuu atu le avanoa i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi: E maitau o le a faaiuiu le saunoaga a le Afioga i le tamaitai sui usufono. O le mataupu lea na e taua tatou planting materials, o fualaau aina, o fualaau taumafa ma faisua. O le tatou asiasi foi lea nursery a itumalo lea e lalata atu, o Poutasi i Falealili ma Lefaga i Savaia, e fautuaina le tatou itumalo e o ifo i ina, o lena e i ai uma lava tulaga o meatoto, nurseries, o mea eseese, niu, popo ma mea eseese. E faapena la ma fatu kapisi. A le maua, ia ona agai sao loa lea i Nuu, o lo o lava ma totoe le tatou nursery tele la e i Nuu e mafai ai ona tuuina atu so o se ituaiga faafailelega kapisi, tamato, ia ma mea uma lava o lo o faapena. Ia lava pea le onosai o lo o taumafai fuafuaga a le tatou Matagaluega, ona ua vavamamao tele le fale lea i Poutasi i Falealili ma le atu Aleipata agai i Anoamaa.

O lo o i ai le faamoemoe i le lumanai i le alofa o le Atua e fai se isi tatou fale faapena i le va o Aleipata ma Falealili, ia po o Falefa po o le Fale Vaimauga, ona ua mamao tele le tuli mai Nuu toe tuli agai Poutasi. A o

fua fuaga na, ae faafetai atu o lena e lagolagoina le faamoemoe o le tatou Matagaluega ina ia lava taumafa. Ae ou te fautuaina foi lau Afioga ma le tatou sui i Aleipata Itupa i Luga ma Aleipata Itupa i Lalo, e vaai le tatou uluai seleselega. O lea lava e apoapoai atu aua o i ina, e alu atu fua uma lava mea na, e \$10,000 le tinoitupe e avatu uma ai planting materials ma so o se ituaiga meafaigaluega eseese ia ma le seleni e avatu i le tatou itumalo.

O si au toe faamalamalama atu lea mo le silafia e le Afioga i le tamaitai sui usufono.

FOFOGA FETALAI: Malo faafetai. Atonu o lea ua faafofoga ma le totoa le...

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai faamolemole pe maua se avanoa.

FOFOGA FETALAI: Mo le faasaoina o le taimi o lau Afioga i le sui usufono, se i tulai mai lau Afioga i le sui usufono mamalu mo Aleipata Itupa i Luga.

Afioga Fuaava Suluimalo Amataga: Faafetai. Ia o le manumanu lava e sefe le taimi o le tuafafine foi mai si o matou itumalo, o lea ua ia taua le tulaga lea i mea tau faatoaga. Ia na ona faailoa atu pea, o lea ua i ai le fua fuaga a le matou itumalo, ma ua uma foi ma maea ona faamama le eleele lea o le Malo lea e fausia ai nei le matou ofisa. O lea foi la ua amata ona faagaoioi le Ofisa a o la e foi e faavagavaga le isi vaega lea foi sa matou tatalo ai i le Minisita foi o le Siosiomaga i le eleele lea, mo le fua fuaga lea i le tatou Ofisa o Faatoaga. O lea foi ua uma ona oo atu ai le Ofisa o le Fuimu, pei ona tauala atu le talosaga i le Minisita o Fuimu ma Leoleo, ia o la e foi ua i ai se vaega i ina. Ia e tatalo pea i i le Minisita o Faatoaga.

Ae na ona faailo atu, e lelei lea e tu ogatotonu e service mai ai le agai mai lea i Fagaloa ma le agai atu foi lea i Lotofaga agai Falealili, e pei e tutotonu, e maua le Falemai, maua Leoleo, maua Fuimu, toe maua ma le Ofisa o Faatoaga.

Ia ma le faaaloalo lava. Faafetai.

FOFOGA FETALAI: Malo faafetai. Ia mea sili foi o lea ua malamalama le sui usufono mamalu. O lea foi e fesoasoani atu le uso a sui usufono i Aleipata Itupa i Luga. Malo lava faafetai. Ia faaauau mai le saunoaga.

Afioga FAAGASEALII SAPOA FEAGIAI: Ia malo faafetai. Faafetai foi i lau Afioga i le Minisita e tusa ai foi ma le taliaina foi o se talosaga.

Aua pau lava lea o le naunautaiga o le totoina o fualaau aina, pau lava lea o le togafiti o le toto maualuga ma le suka, e taofi mai ai tatou mai le o i le faamamatoto e pei ona tatou vavao ai. Ae faafetai mo le taliaina o le talosaga.

Ia atonu lau Afioga i le Minisita mo le Soifua Maloloina, e faaiu atu sau faamatalaga e tusa ai foi ona faamalulu atu i le atunuu e pei ona tatou faalogoina foi nisi o faitioga ma nisi o tuuaiga i lena itu o le Motu sa tuuaia ai foi tausisoifua o Samoa e faapea mai e le agavaa ma le amanaia le latou auaunaga.

Ou te fautuaina lau Afioga i le Minisita e auala atu ai se leo o lenei auaunaga aemaise o le Sosaiete o Tausisoifua o Samoa ina ia silasila ifo i ai i nei lafoga ma nei tuuaiga ua tuuaia ai tausisoifua o Samoa e tusa ai foi ma lana auaunaga. E pei ua aliali mai ai ua le amanaia, o le a aveese ai foi le talitonuina o tausisoifua i le tatou atunuu. Ae pei ona silafia, mai lava i le Misela oo mai i le Koviti-19 o lea sa outou silasila lava i le faatinoina e tausisoifua o le galuega, ae pei ua le logomalie foi, ua lagona foi le tiga, ua lagona le ita i totonu o le Sosaiete ona o nei lafoga tuulafoai. Ona o lea e pei foi ona matau atu ia o le taimi tonu lea lea sa malaga mai ai lena itu o le Motu, lea sa fai ai tou faatalatalanoaga, a o le vaiaso lava na foi atu ai a o le isi vaiaso ae sau loa le faasalalauga lena, e le amanaia tausisoifua a Upolu ona e low le standard. O lea e tuuina atu ai i ina, ona o lo o i ai foi tausisoifua mai le Pasefika o lo o aotauina i totonu o le tatou Iunivesite.

Afioga Valasi Luapitofanua Toogamaga Tafito Selesele: Lau Afioga i le Fofoga Fetalai...

FOFOGA FETALAI: Malie le sui usufono se i tuu atu le avanoa i le Minisita mo le Soifua Maloloina.

Afioga Valasi Luapitofanua Toogamaga Tafito Selesele: Ua leva ona maitauina le saunoaga a le sui usufono mamalu, ae ou te talitonu foi e le auese i le finagalo a le tamaitai sui usufono. Na pau o le mea ua vaavaai atu i le tamaitai sui usufono toetoe lava a gasegase i le naunau. Ae o le lalolagi lenei tatou te feola ai, e tofu lava le tagata ma ona lagona ma ona mafaufauga. Ua outou silasila e le o gaevale lava le Minisita o le Soifua Maloloina. Ua uma ona fai fesootaiga, sa ou i ai i Tutuila i le vaiaso lea na tupu ai le mea lea. Ou te le i faalogo i ai, a o tala a tagata aua e le masani ona ou alu i ia mea o upega tafailagi ma mea faapena, e tele ai le faitala ma le tele o manatu eseese. Sa ma feiloai ma le Konesula, la e faafofoga mai le Konesula o le tatou Malo i Tutuila i ala o mea. Sa fai ai le fonotaga a le Konesula ma le suafa lea, pei o le alii lea sa fai ana faamatalaga aemaise foi sa matou breakfast ai ma le Kovana. Lea e le o nofo mai le Minisita sa matou i ai, sa valaaulia ai au. Ma sa i ai foi le tuualalo. O le tatalo foi sa

matou talanoa foi i le Kapeneta ma laga. O le fautuaga, aua ne i tatou amanaia le pola e motu i tua. Taatia pea le tagata ia e fai ona mafaufauga ma ona lagona, ae o lo o soifua le Atua, o lo o silasila le Atua i o outou tiute ma o tatou faiva, ia e mulimuli lava galuega lelei, aemaise, o a lava mea ua faifai mai foi lena itu. Ia e le o se finagalo o Amerika Samoa, o le tagata e toatasi. Sa faamalulu mai foi latou i nisi o tulaga. Aua o le taimi tonu lea o le vaiaso na tupu ai le mea, a o le isi vaiaso ou i ai i Tutuila. Ia o lea lava, masalo o faafofoga mai le Konesula sa matou fale, o le aso lava lea na fonu ai ma valaau i ai le uso lea sa na faia faamatalaga.

Ia, o lea ua toe lagalaga, o le fautuaga, ia olo lava le fua ma tatou faimalu faiva, ia e tietie lava i le tagata ia ona malaia ma ona mala. Afai ua afaina ai le finagalo ia leaga o lea foi sa lotea e le Kapeneta ma ua matou mautinoa, ia taialalo le i'a a Sa Saumani. Afai na soifua Iesu i le falemanu, o faailoga o le filemu ma le agamalu ma le maualalo, ia faapena tatou. Ia tausolomua i le Maota lena ona maua le agaga faamagalalo. Ua leva ona ou faamagalalo i ia lafoga, ma o lo o manuia lava le soifua maloloina o Samoa. Ia manuia le aso.

FOFOGA FETALAI: Malo faafetai i le saunoaga malamalama foi a lau Afioga i le Minisita. Atonu o lea ua faafofoga mai le sui usufono mamalu, aua laia e te popole, o lea ua uma ona tapena uma e le Minisita ma le Matagaluega itu uma aemaise foi o le tatou va ma o tatou uso i Amerika Samoa.

O le mea lea, aua le faapopoleina le tofa i lau Afioga i le sui usufono mamalu. Faaauu mai le saunoaga.

Afioga FAAGASEALII SAPOA FEAGIAI: Ia, o le a le toe tele se upu i la lea itu, e momoli atu le faafetai tele i lau Afioga i le Minisita. E leai, ona o lea sa nofo faatali lava ma sa maitau mai foi le Sosaiete i se tali atu a lo tatou Malo i lea mataupu. A o lea faafetai o lea ua manino le mata o le vai, o lea ua outou feutagai. Aua e le o nofoai foi le Sosaiete i ana tapenaga o lo o faapea foi ona tuuina atu i lea itu o le motu.

A o lena itula, e momoli atu foi le faafetai i Minisita uma lava o le tatou Malo, o e o lo o tauaveina le tatou Malo. Faafetai mo galuega lelei, mai lava i le la tausaga seia oo mai i lena tausaga, ia malo faafetai. Tau ina ia faamanuia le Atua i galuega o lena tausaga ina ia aveaveai ai pea le tatou galuega lelei mo le atiaeina o le tatou atunuu.

Lau Afioga i le Fofoga Fetalai, pau lena o nai motugaafa a lena itumalo, ia tau ina ia faamanuia tele lava le Atua i lena aso ma ona taualumaga uma. Amene.

FOFOGA FETALAI: Malo faafetai, malo saunoa. Faafetai foi i lou sao o lea ua faafofoga le paia o le Maota aemaise foi le tatou faigamalo mo lou sao i le tatou Tala Faatatau Faaopoopo o le Tala o le Tupe.

Ia, e i ai nai fautuaga ia e fia tuu atu, faamolemole e lagona uma atu lava i luga nei talanoaga ae fesoasoani atu i tatou sui usufono mamalu e tau faamama le tatou talanoa, e lagona uma atu lava i luga nei mea uma. Ma le agaga faaaloalo.

Se i tulai mai le sui usufono mo Satupaitea. Tulai mai lau Afioga i le sui usufono mamalu.

Afioga Hon LAUTAFI FIO SELAFI PURCELL (Satupaitea): Faafetai i lau Afioga i le Fofoga Fetalai mo le avanoa. O le a le toe oo lava se tala i le taligasua ua uma ona saunoa i ai nisi o sui usufono ae faafetai i le Ofisa o le Fono faapea lau Afioga mo le tatou meaai matagofie.

A o le i faia se tala a le sui usufono lenei, e muamua lava ona ou faatulou ma ou faatalofa i le paia o Tiafau nei, e afio ai lau Afioga i le Fofoga Fetalai, afio le Afioga i le Sui Palemia, afifio Minisita o le Kapeneta, afifio foi Minisita Lagolago o lena Itu. Liliu mai foi i lenei Itu i le afio o le Sui Taitai ma sui usufono o lenei foi Vaega Faaupufai. E faatalofa foi i sui usufono o lo o taumafai se latou Vaega Faaupufai Tutoatasi. E faatalofa i Afioga i Ofisa Sili o Pulega o Matagaluega, faamalo le onosai, faamalo le tauatai. O lea ua toe amata a tatou Fonotaga o lenei tausaga, ia alo mai tatou galulue faatasi.

E faatalofa ma faatulou i le faafofogaaga a Samoa. E mai lava i mauga tetele seia paia mauga iti. O le a ou le oo lava i paia o Samoa. E faatalofa i le paia o si ou itumalo, mai lava i Malaeaoga seia paia Falepau. Ua faamalo la outou tatalo, faamalo lo outou tapuai i lena foi tausaga ua mavae atu, sa taumafai la outou sui usufono, e molimoli lo outou fofoga aua se sao o Satupaitea i upufai a lo tatou Malo. O lea ua amata lenei tausaga, o le fono muamua lenei. E manaomia lava e lo outou sui le tapuaiga ma lo outou lagolagosua mai, e maua ai manatu e faaleo ai outou finagalo i totonu o le Maota lenei.

Lau Afioga i le Fofoga Fetalai, a o le i amataina se sao o Satupaitea e uiga i le Tala o le Tupe, se i fai atu lava si au tala puupuu lea. Na ou malaga i Niu Sila i le vaitaimi o le Kirisimasi, na ou malaga i le 3 vaiaso. Sa amata la le asiga o nai fanau, faapea foi siaki faafomai. Sa amata la le asiasiga i Hawkes Bay i Hasting. Ae ou faalogo ua siimai atu le afioga i le Tamaitai Palemia, ona ou faatali lea se i ou alu ifo i Aukilani, ona oo lea i se tulaga faapena. Na ou alu ifo la i Aukilani, o le Aso Sa la na tea nei sa ou alu ai e asi le Tamaitai Palemia i le falemai maua ma le matou aiga. Aepeitai ane ma te o atu, ae fai mai le fomai, e faamalie atu ua tea i tua le gasegase faatafa o le Tamaitai Palemia i le Aso Toonai lena na tea nei. O le tala lena na aumai. Sa lagona lava le fiafia, aua afai o lea ua tea i tua, o lona uiga ua

solosolo manuia le faatafa gasegase o le Tamaitai Palemia. Na ma taumafai e fesootea atu i le tatou konesula, po o fea se mea e maua ai, ae le i faamanuiaina le taumafai atu i le konesula o le tatou Malo. A o le agaga fiafia ona o lea tatou te tapuaia le faatafa gasegase o le afioga i le Tamaitai Palemia i aso uma. Ae o lea sa ou taumafai ou te talanoa i ai, ae o le tala lena, ua tea i tua i lona aiga, po o fea le mea la ua i ai, ua faasolosolo manuia. Ia faafetai i le alofa o le Atua, o le viiga lea e ave i le Atua.

E i ai lava taimi e fai ai tatou Vaega Faaupufai, ae i ai lava taimi e tatau ona fai le mea e tatau ona fai. O le tulaga lena, leaga o le Taitai o lo tatou Malo. Ua fetauti le sii gasegase atu, a o lea ma te i ai i o i Niu Sila, o le tulaga lena. E le mafai ona nofonofo se sui usufono ae o lo o gasegase le Taitai o le tatou Malo i atunuu o lo o i ai. E le i maua se avanoa e maua ai se tala e uiga i le afioga i le isi foi Minisita o Pisinisi, le afioga ia Leatinuu, po o le a le tulaga o lo o i ai, ia talosia. O lea tatou te talosia faatasi, ina ia toe faafoi le malosi ma toe foi mai, e tauave lo tatou Malo.

Lau Afioga i le Fofoga Fetalai, ona oo mai lea o se manatu i le Tala o le Tupe Faaopoopo, o le Tala o le tupe foi e le o se tala tele. O le Tala Faaopoopo o le tupe lena, e fai lava i tausagasuma tausaga uma, e uma le Tala Autu, ae i ai isi mea e toe oso mai, lea e faaoga i ai le Tala o le Tupe lea. O le aoga o le tatou talanoa i le Tala o le Tupe, aua e avatu ai foi isi manatu i nei, e avatu ia i matou sa i ai i le faiga foi o nei mea o le Tala Faaopoopo o le tupe, e fesoasoani, silasila foi i ai lena itu, po o a ni mea o i ai i i, e tatau ona faaopoopo i ai. E le faapea a talanoa loa i le Tala o le Tupe, faapea e aveese mea ia, aveese mea ia. E leai, e avatu foi manatu pe i ia ni mea e tatau ona i ai i la matou tilotilo, ae o lea e misi mai i ina, o tulaga faapena e tatou te galulue faatasi ai, aua fai mai a tele lava lima, e mama foi se avega e fai. O le mea foi lea e lelei ai le tuai ona lauga, ua uma lava le tele o mea ua lauga i ai sui mamalu. E leai foi se manatu e toso foi ia le tatou fono ona e toe faaopoopo foi, ae i ai lava mea e tatau lava ona avatu e fesoasoani i le tatou Malo ia outou faaiuga fai ma fuafuaga i le agai i luma.

Ae ou te le i amata lau afioga, ou te faatalofa atu lava i le Ofisa Sili o Pulega o le Matagaluega o le Soifua Maloloina, lau afioga Aiono faapea le afioga ia Aeau, e pei o oulua lea e fou mai i le Ofisa o Aoga, lea e fou mai le tofiga o oulua, ia faamalo le tauivi. Omai laia tatou tauaveina faatasi ma lena foi Vaega ia le tatou galuega.

E amata atu se faamatalaga i le Matagaluega o le Soifua Maloloina i le afioga i le Minisita. E sao lelei le Minisita lena, o ai lava le tagata e faaletonu lona soifua maloloina, o le sulufaiga lava lea. Na ou sulu foi au i ai, ina ua tau faaletonu foi le... e ese le talimanao o le afioga i le Minisita. O apoapoaiga lava lau afioga, ona o lea sa ou toe foi mai Niu Sila, o le faamai lava lea o le Koviti. O la foi ua amata lava ona toe iloa e Niu Sila, o la lava e pei se mea o la e punapuna lava, pei se public awake e i ai se taimi

e toe ono tulai mai ai, aua tatou te le o mautinoa lelei, pe ua iloa uma lava e fomai ma saienitisi ia auga o lenei faamai. O le tuualalo i lau afioga i le Minisita, o lea ua tatou oo mai i le taimi lenei, atonu o lo o lelei taumafaiga a le tatou Matagaluega, ae aua le tuuai, ae ia tatou taumafai pea. Let's be on top of our game i le faamai lenei. E moni o lea ua tatou o faapea e tai pei o le flu, e manage lava e pei o le flu, its part of life. Ae o lea tatou te silafia, e le toatele ni tagata e fai ma maliliu i le flu. Ae o le faamai lea o lea tatou te silafia i le lalolagi atoa, aemaise foi o Samoa, aemaise lava lo tatou atunuu e tele lava i faamai ia e asosi tele i ai le faamai lenei. O lea e maua i le non-communicable diseases, o le toto maualuga o le sela o tulaga faapena. E aafia tele lava pe a toe aafia i le faamai lenei. O le talosaga i lau afioga, faaauau le matala, o lea ua afio mai le afioga ia Aiono lua te galulue, o ola o le tatou atunuu lena e i oulua lima, pe a te i ua toe tulai mai. O lea ua ou faalogo i isi tala o le lalolagi e pei o Saina, ia o Saina sa faamamalu lava, e oo lava i le masina lea na tea nei, o faamamalu lava le faiga o latou puipuiga. A o le a le mea la ua i ai? O la ua toe lavea lava. Aua ne i oo le tulaga le la ia i tatou, aua tatou te...let's not be complacent lau afioga. Tatou mataala pea ina ia puipuia le soifua o si o tatou atunuu.

E faafetai i lau afioga ona o le tulaga lea na tuu ou te lauga atu ai, ae te i ua fesootai mai le pule o Savaii, o la ua oo atu le tender process i le faiga o maota ia o alii ma tamaitai fomai po o doctors. Ua leva lenei mataupu, e masani foi ona ta talanoa ai ma faasino atu lava i lau afioga le mea la ua uma ona teu lelei e fai ai le maota lea. E tele lava le aoga o le maota lenei, ia nofo ai lava le fomai i i, i talaane o le falemai. O le tulaga o i ai, e fiu e vilivili le fomai po o fea la e i ai i nisi taimi, a o la e alu i lo latou aiga po o fea la e nofo ai, ona faaletonu ai lea. Ae a nofo i i, e leai se faaletonu. O lea ua uma ona faasino i lau Afioaga ma ta talanoa foi, o i i, i luga i le mea lea, ona e i ai isi fuafuaga. Ona ua ou faalogo atu e pei e ese le mea la e tau o le Matagaluega e fai ai le fale, o le mea e faigofie ona fai. Ae silafia foi o i i Satupaitea, i le mea tonu lea e tu ai le falemai, o le matua gaoa lava, ae na taumafai lava e faalaugatasi luga o le aena e tu ai le fale o le fomai.

O le talosaga lea i le Matagaluega i te i ua o atu nisi e le malamalama o atu lea fai ni faaiuga e le tusa ai ma le finagalo o le itumalo, lau afioga.

FOFOGA FETALAI: Ia malie le sui usufono mamalu, se i tuu atu le avanoa i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: Silasila i pepa ia ou te vaai i ai i mataupu sa laga e sui usufono. Sa tuu la ina ia avatu ai le tali, aepeitai o se mea fou lea faatoa e talanoa mai ai i fafo, vaeatu le Maota. Ou te faatepa lau afioga i le Minisita, i le mea sa fai i le potu o le itumalo. E alu atu le asiasiga a le komiti, o lea e nofo mai le komiti. E matautia le manogi o le septic ona e mafua i se a? Na fai i le

poto a lou itumalo ae le o se fautuaga na avatu i inisia faapitoa a le Matagaluega. O le a le mea ua e silasila i ai, o la ua uma ona toe fai. E na ona aumai lava e le komiti a le Palemene faatonu e le Minisita o le Matagaluega ia fai, ia vave. Afai la o faafofoga mai ia le itumalo, o le mea lea ou te faaeteete i ai lau afioga i le sui usufono, o le vaai a le Matagaluega e ou inisia, o le fuafuaina mo le galuega, ae a toe lou loa e le... o le a taatia mai lau talosaga, afai e te le finagalo i mea lea e manao ai le Matagaluega, toe toe tolo la lau galuega. Ae o galuega ia o fale o fomai, e tautino atu i le tatou Maota, o lea ua fuafua ua tuu i konekarate ina ia faatino galuega, o le faaupuga ua fai, ia oo ia Iulai o le tausaga lenei ua uma ona fai fale o fomai. O le agaga lea e le o se tala ole, ae afai ae faapea le felouai e avatu le fuafuaga ma o atu le Matagaluega e vaai, ae toe manao le itumalo e toe sui, ona toe sui foi la lea o le aso ma le mea e faataunuu ai. O lea e tatalo atu i lau afioga, ia taatia mai lau talosaga. E ui lava ina faigata, ae o le a toe faatonu le Matagaluega pe afai o faafofoga mai, ia fai le mea lea e finagalo ai Lautafi ma le itumalo. Ia Lautafi, aua e te masalosalo, o le Minisita e le o se pule, ae silasila i le mea e manao i ai le itumalo. Ae pei lava ona ou fai atu, o le mea na tulai mai, sa tupu i lou itumalo talu ai nei, ae asiasi atu le komiti o le palemene, ua le nofonofoia lou falemai i le manogi se i tulou. O le a le mea na tupu? Na lipoti mai lava e le komiti ma le taitaifono, ia faaemo loa le galuega, ou te iloa ua e susu atu ua manaia ua manogi lelei pei o le perfume a le tamaitai le manogi o le septic. Ia fiafia laia, o lea ua ou fai atu, o le a fai le mea lea e te finagalo ai, ae tuu le mea lea e manao ai le Matagaluega. Ia manuia.

FOFOGA FETALAI: Ia malo faafetai, tulai mai lau afioga i le sui usufono.

Afioga Hon LAUTAFI FIO SELAFI PURCELL: O le mea lea e ese lou fiafia ai i le Minisita lenei, o le tali manao ma le malamalama. Lau Afioga i le Minisita, e le faia i se mea ou te manao ai, ae afai o le a aafia le taimi e fai ai galuega a le Matagaluega e fai le fale, e taua ia te au le fai o le fale, na i lo mea o lea sa fuafua mai lava i le amataga i lena taimi, ma le manatu o i e mamao ese atu le fale o le fomai. Ae afai o le a aafia ai le taimi e fai ai le fale o le matou fomai, fai i le mea lena e finagalo i ai le Matagaluega. Ia taatia mai se manatu o le itumalo ia, se i sue pe o le a se isi mea e fai i luga i ina, ae faafetai tele i lau afioga. O le mea e sili ai o lea ua faagasolo, o le mea taua lena.

Ona ou oo mai i le Matagaluega o Galuega Tetele a le Malo. E tasi lava le manaoga o le itumalo lenei, e tasi lava lea na ou faaleoina muamua. Ona o tulaga o siisiiga o le tai, lea na aafia ai lava nai ou Pitonuu tai ma Vaegā, i le lolo vai, ua alu atu le galu ua alu i totonu o umukuka o aiga, se taimi faapena. Atonu e i ai se taimi ona tatou asiasi lea i ai. O lea foi na ave le

talosaga i le Minisita o Siosiomaga, ona o i o se vaega o oulua e fia maua ai sina fesoasoani. E pau lava lena o le manaoga o le itumalo lea ou te avatua. Se tofa i lua afioga, po o le a lava se faiga e mafai ai ona vave ona foia le faafitauli lea. Ona o le taimi lava lea o la foi e louloua le tau, e le taumate foi ua aafia ia si ou itumalo, i nai nuu ia i le siisii o le sami.

O nisi vaega ia lau afioga i le Minisita o Galuega tetele, sa ou i Savaii i lou itumalo a o le i faia le Kirisimasi. Sa ou tietie atu ai, ae ou vaai atu, ua ese le konekarate lea ua moaina le vao a le nuu. Ua le i ai le konekarate masani lea sa i ai, e alu atu i Salelologa. Ou fesili atu lea, o le a le konekarate lea ua outou faia, ae fai mai le tali, o matou lea ua mauaina le konekarate lenei. Ua leai le konekarate lea sa faia la outou galuega. A o le mea lea na ou tuitui ai lava au i lo matou foi vaitaimi, ave le avanoa i nai konekarate Samoa laiti ia e taumafai, aemaise lava latou la e nonofo i Savaii, fai a latou galuega i Savaii. Se i vagana lava ni galuega tetele e le mafaia e latou mea faigaluega ona fai, fai i le standard lea e manaomia, atonu ona avatu lea, o le vaega maumea ia e i ai, lea e tele le tamaoaiga, lea e i ai masini lea. A o le mea lea o le moa o le vao, ma le fai o teuteu o auala foi ia, sa ou faapea e tuu pea i konekarate laiti ia la e i Savaii, e maua ai a latou tupe. O le tala a nai konekarate ia, e na o le faagao lava ma fufulu taavale ma masini ma faatutu ai lea seia maua ni galuega, ae o lo o alu i luga totogi o nonogatupe sa fai ai foi... maua mai mea faigaluega ia sa tauave ai galuega.

O le tatalo i lau afioga, se i tagai ane i ai, afai o le vaega lea o lea e tele a latou galuega iinei, ia tuu latou iinei, ae faamuamua a tatou pisinisi laiti la e fia ola foi i latou i Savaii. Fai lava e latou galuega i Savaii, pe afai lava latou te mafaia i le tulaga, i le standards ia e tatau ona oo i ai.

FOFOGA FETALAI: Ia malie lau afioga i le sui usufono mo Satupaitea, se i tuu atu i le Minisita o Galuega.

Tofa Hon Olo Fiti Afoa Vaai: Faafetai tele mo le avanoa, e faafetai atu lava i le afioga i le sui usufono, Hon Lautafi mo le mataupu, e taua ia. O le tulaga foi lea sa matou omai o lo o tilotilo lava ma feagai foi ma ia faafitauli. O le taumafai lea e faasafua le tulaga o galuega i nai a tatou konekarate peitai ona o lea tatou te mulimulitai lava le tulaga foi lea o le tauofo, e pei foi ona i ai le saofaiga foi a lena Itu. E fua lava i ai le tulaga o le manumalo i se tau maualalo. Ae sao le saunoaga, o lea lava e tilotilo po o le a se isi faiga e fai ai, e le i avatua foi se talosaga i le Kapeneta pe mafai ona toe liuliu le tofa i le afioga i le Tamaitai Palemia ma le Kapeneta, i se tulaga o le toe fetuunaiga o le threshold foi lea, e ave agai i le tenders board ma le faatino lava e le komiti faafoe ia po o tatou Boards ia faaiuga, ae se i share ia le tulaga tonu lava lea ua saunoa mai ai lau afioga.

O le isi foi la tulaga i moagavao, se i tulou lava le Maota, o lo o autilotilo lava i i, i masini faapitoa e faatino ai le vaega lea, ona e agai faatasi ia le tulaga lea ma tatou alavai. O le tele la o konekarate foi ia a tatou aiga ma nuu ma mea faapena, e le o i ai ia i latou le tulaga o masini e faaleleia ai vaega ia o lo o naunau atu i ai le Pulega o Felauaiga o le Eleele. Ae taua le tulaga lea, faafetai tele foi i lau afioga, mo le laga o le mataupu lea, o lea foi e faafogafoga mai le Pulega, se i tau i ai se fetuunaiga. Ae i le mea lava lea o le taumafai e share ia le tulaga o galuega ina ia tofufufusia uma ia konekarate ma galuega e maua ai foi ni a latou tupe. E le tuua ai la le tulaga foi lea o le faasala i le le faamaoni foi e fai galuega. O la e faafogafoga mai foi le Pulega, i le isi konekarate na o atu fai le hump i o i lou itumalo, le itumalo o Salega 1, ou te le iloa pe na faapefea ona fai lea... o la e faafogafoga lelei mai lava le konekarate na faia. O ituaiga konekarate la na e le manaomia. Afai lava ua le faamaoni ona fai le mea lea, e mafai e le Pulega ona sui atu se isi konekarate, i le tulaga o le faatinoga o galuega, leaga o tupe a lo tatou atunuu la e totogi ai le faiga o galuega ia. Ma le agaga faaaloalo lau Afioga i le Fofoga Fetalai.

FOFOGA FETALAI: Atonu o lea foi ua malamalama le saunoaga a le Minisita. Lau afioga i le sui mamalu o Satupaitea.

Afioga Hon LAUTAFI FIO SELAFI PURCELL: O lenei ua taatia atu, e pau lava le agaga ia, e leai e le fai atu, a mea e...afai lava o la e leaga le faia o galuega, ae o la e tuu pea i ai galuega ona o latou e omai i Savaii, e leai, o le mea ia e fai lava le mea e tataua ona fai. Ae o le alofa foi lea, ona o konekarate ua leva foi, ua latou malamalama foi i tulaga e tataua ona fai, e agai i ai galuega e talia ai e le Malo ma le LTA.

Ona sa saunoa le isi sui usufono, faatoa vaai lava lea i le tele o ni vaa i le uafu, laina mai tai isi vaa e fia omai i uta, a o la e tu isi vaa. O le vaaiga lelei le mea lenei, o se vaaiga lelei. O le mea foi lenei sa taumafai i ai lenei Vaega Faaupufai, e fai le tatou uafu lea i i, i Vaiusu, ina ia tau fai palalasi uma mai vaa omai uma i uta, aua le tutu mai tai, aua o le tutu mai foi i tai e le tutu fua. E i ai foi o latou tau la e faaopoopo, e uma ae lava ua fafa i luga o latou ia e i ai a latou oloa i vaa ia e tutu i tai. E oo mai i uta, ua fafa i luga o tagata faatau. O le tulaga lenei, ae talosia, e manaia tele le fuafuaga o i ai, i vaa oloa ma vaa ia turisi lea ua amata ona omai. O le naunautaga lenei o lea sa i ai se manatu o lenei Vaega Faaupufai, mo le uafu lea e i Vaiusu. Ae na ona taatia atu faapena e valuvalusia pea aa o le fau.

Ona ou see mai lea i galuega faavaitaimi, ua tele foi tala tele faaupuga, tele foi taimi e talanoa ai, ae tataua lava ona pai i ai sau faamatalaga. Ou te lagolagoina le review e fai, o le review o se mea tataua. Ma na initiate i lou taimi ia le fai o se review, o la e silafia e le Matagaluega, e silasila i se auala e review ai le mea lea ua oo i ai, ua tataua ona fai se... ia o lea ua

faaaauau e le... ia po o ua i ai ma nisi mea ua faaopoopo atu i luga o le review, ae o le mea ua tatau ona fai. E pau lava lea o le pona i si au tuualalo, maumau e, pe ana silisila lelei i le taimi e fai ai. E le gata i le taimi a o le auala e fai ai. O le mea foi lea o lea ua taofi tu lava, faapea e taofi mo sina taimi. E leai se mea e toe tupu. Ae manaia lava pe ana faaaauau pea, ae review as we go, running review, ona leai lea o se masalosalo, leai se polevale. E faapea foi le review a le tatou Public Service lea e fai nei, le ituaiga review, aua le taofi tutu lava. E le toe i ai ni ovataimi leai ni new appointments, tulaga faapena ae faaaauau pea, ae sailiili malie po o a ni mea e tatau ona sui ona sui lea, a leai foi ni mea e le suia, ia aua le suia, o le mea lena o le review. E pei o le process, the way and approach its being conducted, o si ou popolega lena, e tupu ai le le mautonu o tagata faigaluega, e create ai le anxiety, anxiety creates stress, o le stress o lena tou te iloa. E mamai ai, aua o lea ua le mautonu pe i ai sou avanoa, pe a uma nei le review lea. Ae a faigaluega lava, pei lava lea e normal, a sau le faaiuga a le review o le a le tulaga e i ai. O se auala e faafaigofie ai lea ona ofi i finagalo o tagata aafia. Ua ala ona ou fai atu i le taimi lea e fai ai le review, i le seasonal work, ona o lea sa saunoa le isi sui usufono...

FOFOGA FETALAI: Malie le sui usufono, se i tulai mai lau Afioga i le Sui Palemia.

Afioga Hon Tuala Tevaga Iosefo Ponifasio (Sui Palemia): E leai se afaina o le saunoaga matagofie ma le fautuaga o lo o faapena ona tuuina mai e le sui usufono mai Satupaitea. E na o sina mea lava lea na mafua ai ona ou tulai atu i le aso ananafi. Ona e faatupu manatu ia saunoaga, o lea ua saunoa mai le sui mamalu, i le tulaga o le uncertainty. O le mea tonu lava lea, e toe faa-Samoa mai e faapea, e popole ai le tagata faigaluega pe toe maua sona avanoa. E le afaina le saunoaga o la e sao lelei le saunoaga. Ae pau lava le mea lau afioga i le Fofoga Fetalai, e tatau ona faailoa atu i le Palemene, aemaise foi o le afaigaluega a le Malo o lo o faafofoga mai, e le o i ai se tulaga faapena e aveese ni tagata. O le review o le alu agai i luma, o lea na manino lava i avatuga ananafi, o le vaai i luma o le vaai mamao. Ae o le taimi lenei, o lo o secure employment a tagata faigaluega, maua le galuega e leai se mea o afaina ai le galuega, i le taimi nei. E pau lea o si mea lau afioga ae faafetai mo le fautuaga.

FOFOGA FETALAI: Ia tulai mai le sui usufono o Satupaitea e faauma mai le saunoaga, toe tasi lou minute.

Afioga Hon LAUTAFI FIO SELAFI PURCELL: Faafetai i lau afioga i le Sui Palemia, o le agaga lava ia ia avatu ni manatu e faufau ai a outou

faaiuga fai, e fesoasoani atu, tatou galulue faatasi. Pei o le mea lena ia te au ia, aemaise o le seasonal work, ona o le taimi lenei, o la e tau ai le apu i Niu Sila, o le taimi lenei, leaga e masani ai ona ou alu i le taimi lenei i faaiuga o Ianuari. O le taimi lena o le peak season lena i le tauga o le apu, piki ai ma le aniani, atonu o lea ua leai ni aniani ona ua tuai ona avatu tatou tama. Ae o le fonu a le Apple and Pear Board, na faamatala aloaia mai ai le pikiina o le fruit i le taimi e tatau ona piki ai. Afai a o le vaiaso lenei e tatau ona piki ai e tatau lava ona uma. E tuu atu loa i le isi vaiaso, alu i lalo le quality o le apu. Tatou te le iloa e tatou leaga o apu lava e aumai e le o apu na. A o i latou ia e vaaia faatoaga ma vaaia le quality o le apu e ai, e taua tele le i ai o le aufaigaluega i le taimi e piki ai. Afai la o le taimi lenei o la ua ia... faaluafesasi lea o le mafaufau, e alu i lalo le tau o le apu, pe a faaletonu le quality. E tele la le tupe lusi. O le mea lena e tau faapea, ia tuu atu i tua se i uma le fuata apu, po o le masina fou ma sui atu i tua ona fai loa lea o le review ma taofi loa ia le aufaigaluega.

O le tulaga lea ua i tagata Samoa e pei ona saunoa le Sui Palemia, ua numera 1 tatou, numera 1 i le mea o le Seasonal Work. E le i faigofie ona o tatou oo i ai i le numera tasi. E o atu Samoa i totonu, po o le numera 6, po o le 5, ae muamua i luma Vanuatu, o Fiti, o Solomona. E le i faigofie la lo tatou oo i luga o le mea lea ua i ai. E tele galuega na fai ina ia talitonuina o Samoa e lelei tagata e avatu ai ona e malolosi, e healthy toe e maua i taimi uma.

E tau faanoanoa ona na faalogo atu i le saunoaga a le Sui Palemia, o tatou, a le mananao foi i ai tatou, ia tuu e o, e toe omai foi. O le agaga lea sa taumafai ai ia tumau lava o tatou, fai mai lava maua atu ia tagata faigaluega malolosi, aua o le tasi ia mea ua numera 1 ai tatou ma le reliable source of labour tatou o Samoa, e sili atu i lo le isi vaega. A le mea foi lea ua tatou aveave lo tatou i luga i i ma mea e pei o le a tatou faatalale ai, tatou o atu ua ave e nisi atunuu la e tauva mai i i, ia ona faaletonu lea. E na ona tuu atu faapena o le tulaga lena.

O le tatou vaalele lau afioga, ia ua tele foi manatu ia atonu ua...

Afioga Hon Tuala Tevaga Iosefo Ponifasio: Lau afioga i le Fofoga Fetalai...

Afioga Hon LAUTAFI FIO SELAFI PURCELL: atonu foi o le a le toe i ai se isi umi o talanoa ai...

FOFOGA FETALAI: Ia, malie le sui usufono o Satupaitea se i saunoa mai ia le Sui Palemia.

Afioga Hon Tuala Tevaga Iosefo Ponifasio: Ia, e sao lelei lava le saunoaga a le sui usufono. O lo o maua pea le fesootaiga ma Niu Sila i le

tulaga o lo o i ai le season lau afioga. Ae sao lelei lau saunoaga, a oo loa i le taimi e piki ai le apu, ia e oo foi i le taimi o le kiwi fruit, ua tataua ona piki e fua i le tau ma tulaga faapena. I le taimi nei, ioe, o lea lava e mataituina lava le tulaga lea i le season o lo o i ai Niu Sila ma le tulaga o le tau.

Ae i ai le manatu e pei ona faailo atu foi i le taimi ua tea, e le umi le taofiga. E le sese le taimi ua fai ai le taofiga lau afioga i le Fofoga Fetalai, o lea lava e fua. O le galuega foi a le Kapeneta, e le tuutalaloa se i oo atu i le la masina ma se taimi le mautinoa. O lea na manino foi i le faaaliga, e na o le 2 vaiaso e taofi ai se i tapena le Faiga Faavae, ia atonu e oo atu i le masina o Fepuari, o le taimi tonu lava lea e tataua ona tau ai le apu, ia ona faaauau loa lea o le tatou polokalame.

O le tulaga lea faapea o le tuulafoai foi ia se faamatalaga a faapea a mananao e ave ia le tatou avanoa i isi atunuu, ia e sao, na ou faia le tala. A o le tala e fai ma le mautinoa ma le manino. Lau afioga, o le mea lea e faalala mai e Niu Sila ma Ausetalia, a outou le omai e piki le matou apu, o le a matou o i se isi mea. O le tala moi lava, na ave ai lau tala ia Niu Sila ma Ausetalia i le matou va i le faatalatalanoaina o mataupu nei. O lena e tou te iloa e le o sao ia le tou mea na e fai, ae e pei ua outou faamatau ia le matou atunuu ma pressure mai matou i le aumai o outou faamatalaga ia.

Ou te le ma e tau atu o le tulaga na lea ua i ai. A o lo o lelei pea ia le fesootaiga i le tulaga lea, o la e iloa, o lea foi e manino le Malo nei, e manaomia lava ia o tatou tagata, ma e le mafai ona faamotu mai e Niu Sila ma Ausetalia le polokalame lena, e manaomia o tatou tagata. O lea lava e tatou te o mautinoa. O le toe faaopoopo atu lea lau afioga i le Fofoga Fetalai.

FOFOGA FETALAI: Malo, faafetai, ia faauma mai ia le saunoaga Satupaitea.

Afioga Hon LAUTAFI FIO SELAFI PURCELL: Ia faafetai, faafetai lava i lau afioga, e le mafai ona tuu ni manatu ia te au leaga o lea ou te talanoa atu i le mea sa ou fealuai ai ma ou iloa ai, sa ou tau apu foi. E pei ona outou silafia i le taimi na ou Minisita sa ou ae i luga o apu e faataitai uma mea nei ia ma le taimi nei sa ou alu ai. Ae ui i lea, o lena ua saunoa mai lau afioga ua uma ona outou talanoa ma... ia o le popolega lava latou leaga e faigata le mea na fai e oo ai i luga i o, te i ua fai nisi faiga, ia tatou o foi lea i lalo. O le manumanuga i avanoa i te i ua le maua.

Ia o le tatou vaalele, ia ua tele foi ia manatu. E pau lava si tulaga foi lea e fai lava ma tulai mai, e gau le vaalele. Ua fiu ua le iloa le isi ituaiga faamatala ioe, e gau lava le vaalele ia. E mautinoa lava e gau. E leai se vaalele... mo lo outou silafia, le Ea Niu Sila, le tausaga faaletupe lea na tea nei, le 2021/2022, toetiiti lava \$600 miliona le gau a le Ea Niu Sila le gau.

O tua atu, toeitiiti lava \$300 miliona le gau a le Ea Niu Sila. A o outou faalogo atu o faapea mai NZ o le a taofi le vaalele e le toe i ai? E leaga e gau, gau le \$600 miliona, ae tulai mai le fia piliona, pe a faatupe manuia ia e maua atu i Niu Sila mai le vaalele kamupani vaalele o le a taofi latou vaalele. O Fiti e \$580 miliona le tupe, le gau a le Fiji Airways, faatupe mai e le latou Faigamalo ia tauave pea le vaalele.

FOFOGA FETALAI: Ua maea lou taimi lau afioga i le sui usufono mamalu.

Afioga Hon LAUTAFI FIO SELAFI PURCELL: Ua tele lava faauilavea a le vaega lea lau afioga. Ia ae na ona faapena atu, aua le faapea ua gau, gau. E na o le \$63 miliona le tatou tupe aitalafu lea sa i ai. Ia e le o se aitalafu lena mea pe a fuafua i mea nei o airlines. O le Qantas, le gau o le Qantas lea sa i ai i le la foi tausaga faaletupe, toeitiiti lava 1 le piliona le gau, ae 9 piliona le faatupega o le aoga o le Qantas le mea na alu atu i totonu o Ausetalia talu ai le vaalele.

O le mea lena, o manuia na o lea sa taumafai e tau atu, e le o le tologi o pasese ma maua mai tupe i i le airline, a o mea e aoga ai le vaalele. Lau mai o tagata, lau mai oloa ma tulaga faapena. Na taua e se sui usufono mamalu o le IATA, e pei o le IATA ia e sao, e faamalamalama atu lau afioga, leai o tatou sa o tatou IATA. E tatou te member o le IATA aua e le mafai ona fai ni tatou booking pe a faapea e tatou te le member o le IATA.

Ia ae paga lea, e le omai fua isi vaalele e pei ona saunoa le sui usufono, pe a faaletonu ia tupe a le isi vaalele e le omai latou.... aua o la foi e gau foi latou. E pei o lea na ou faa.. ae o lea sa i ai.

FOFOGA FETALAI: Ia, ua...

Afioga Hon LAUTAFI FIO SELAFI PURCELL: Ou oo mai lea i le miliona...

Afioga Hon Valasi Luapitofanua Toogamaga Tafito Selesele: Lau afioga i le Fofoga Fetalai, e i ai lava si mea lea e tataua ona faamanatu i le sui usufono, o le mea e fia faamanino...

FOFOGA FETALAI: Se i tulai mai lau afioga Minisita.

Afioga Hon Valasi Luapitofanua Toogamaga Tafito Selesele: O le sui usufono lea a o tulai mai i le Minisita o le vaalele, ou te manatua le interview ina o le tamaloa i luga o le TV. O ana lafoga lea ia Samoa ina ua aumai le vaa talu ai nei lea na toe faafoi. 'Samoa, o lea a uma le tausaga

muamua, maua le isi vaalele. A uma le tausaga 2, maua le isi vaalele. O le tausaga 3, ua fuavaa.

O fea o i ai ia upu? O ia lea na lafoa. E toe faamanatu atu, se aua le talaole, aua le faia ni mea e sese i luma o le Palemene e faafofoga i ai le atunuu. O ia lea na faia lafoga ia, masalo a toe sue i mea na faatalanoa ai, e moni upu ia ou te faia atu ai. Ia ao lea la e finau mai i le vaalele, ae o ia sa mafua ai le isi gau, gau, gau. Ia manuia le Fono na ona faamanatu o upu a le Minisita na i ai leaga o lea sa ou matauina lelei.

E le o fuavaa la, ae ua le iloa pe o le a le mea lea ua i ai.

FOFOGA FETALAI: Faafetai, o lenei foi mataupu ua asoa foi o tatou talanoaina i lenei Maota. Ma ua uma foi ona fai le tala a le Malo. Ia ou te ofo foi au ia te oe o le sui usufono ua matua foi i le Palemene. O a ea toe... o lea ua uma ona taatia faamoemoega ma alafua ua taatia a lo tatou Malo, ia mo lenei Nofoaiga. Ae taatia ia lenei vaalele o le a alu ai le tatou taimi. Ua uma foi ona fai atu le tala muamua a le Nofoa.

O le mea lea, ua maea lou taimi lau afioga i le sui usufono mamalu, aua o mea nei sa e lauga muamua ai foi a o lea foi o le a e toe lauga ai foi. Ae faauma mai le saunoaga.

Afioga Hon LAUTAFI FIO SELAFI PURCELL: O lea o le a faauma atu. Faafetai i le uso a Minisita le afioga i le... o lea na lelei lava ia le ta mataupu ae o lea foi o le a te i lava ta toe eseese.

Afioga Auuapaau Mulipola Aloitafua Mulipola: Lau afioga i le Fofoga Fetalai...

Afioga Hon LAUTAFI FIO SELAFI PURCELL: E sao upu ia sa ou talanoa ai, o upu ia e taunuu pe a ana faapea e toe tulai mai ia le Faigamalo lenei ona o fuafuaga ia sa fai i ai. E pei ona ou fai atu, e gau lava le vaalele, e gau, ae aumai lava isi vaalele, aua o le faiga lena o le mea lea...

FOFOGA FETALAI: Ia ou te lapatai atu i le sui usufono mamalu, e pei lava ona ou fai atu ua maea lou taimi ae o lea ou te tuutuu avanoa atu lava...

Afioga Hon LAUTAFI FIO SELAFI PURCELL: Ia o le a faauma atu lau afioga, faamolemole atu lava o lea o le a faauma...

Tofa Ale Vena Ale (Faleata 4): Lau afioga i le Fofoga Fetalai, pe maua se avanoa...

Afioga Hon LAUTAFI FIO SELAFI PURCELL: O lea o le a faauma atu lau afioga...

FOFOGA FETALAI: Faleata e i ai se mea e te fia faauilavea i le lauga lea pe...

Tofa Ale Vena Ale: Leai ua tatau ona uma le lauga o lea e taumafai atu, lea e vaai atu o le a ta le taimi e le aoga ona le uma le lauga a Faleata...

FOFOGA FETALAI: Ia ua ou manatu foi i lenei taimi, ia o lea foi e tau...

Afioga Loau Solamalemalo Keneti Sio: Lau afioga i le Fofoga Fetalai e talosaga atu ma le ava tele, pe mafai ona faaopoopo se 2 minute o le sui usufono...

FOFOGA FETALAI: E tele le tatou galuega lau afioga i le sui usufono mamalu. O lea e tau faasoaso atu ia le tatou taimi.

Afioga Loau Solamalemalo Keneti Sio: Ia o Faiga Faavae lava e tatalo ma faaopoopo...

FOFOGA FETALAI: Ia ae malie ia faafetai mo le faatulai mai, o lea ua fai atu le tala a le Nofoa, ia ona e fai si tele o le tatou galuega.

Afioga Loau Solamalemalo Keneti Sio: Ia ua lelei lau afioga.

FOFOGA FETALAI: Ia, se i tulai mai le sui usufono o le Aiga i le Tai.

Afioga Auuapaau Mulipola Aloitafula Mulipola: E leai se agaga e fia faalavelave i le saunoaga matagofie a le sui usufono, e pau lava o lea, leaga na fesiligia e le isi sui usufono ananafi se i faamatala le uiga o le Asosi o vaalele ia. Ana e saunoa loa e faagata le mataupu, ou le talatala faavaatiu loa.

A o le saunoaga lea e agai mai e foliga mai e agai mai ia te au, ia malie lau afioga i le Fofoga Fetalai, e tele lava le agaga e tau faamatala le mafuaaga e ala ai ona ou finau i le leai o se vaalele e mo na o le taimi lenei. A ou matau atu, e foliga mai o lea foi ua toe laga, se o le alofa atu lava i lau afioga, ae ua leva ona ou fia talia le manaoga o Satupaitea. Ae ava tele i lau afioga i le Nofoa, faafetai.

FOFOGA FETALAI: Ia malo lava, faafetai le manatu mai. E manatu foi Satupaitea, ia faauma ia ia mea aua ua maea lou taimi.

Afioga Hon LAUTAFI FIO SELAFI PURCELL: Faafetai, se e ala la ona umi ia le tatou Fono ona o le oso sese. O lea lava e fai atu le tala sao ia o faamatalaga ae ese le mea la e tau oso mai ai le Aiga i le Tai. E tele lava taimi, a e manao e ta te feiloai, ta feiloai i tua.

Afioga Auuapaau Mulipola Aloitafua Mulipola: Lau afioga i le Fofoga Fetalai...

Afioga Hon LAUTAFI FIO SELAFI PURCELL: Ia ona ou talanoa atu lea i le Polokalame lea o le miliona, o lea o le a uma atu i i ma uma atu ai...

Afioga Auuapaau Mulipola Aloitafua Mulipola: Lau afioga i le Fofoga Fetalai pe maua se avanoa?

Afioga Hon LAUTAFI FIO SELAFI PURCELL: Ae ma talanoa ma le alii lea i tua...

FOFOGA FETALAI: Ia ua ou manatu, ua lava ia taimi na tuu atu ai le avanoa i lau afioga. O le miliona, ia o lo o maua lou avanoa i tua e toe fesootai ai, e fesootai sao lava i o i le Ofisa o le Matagaluega o Tina, a o le avanoa i i le Maota, ia leai o lea ua faauma atu le avanoa.

Afioga Hon LAUTAFI FIO SELAFI PURCELL: Faafetai tele i lau afioga mo lou avanoa. Faafetai foi i le lava o lou onosai, ia foi pea e le Atua lou soifua laulelei ia aua le faafoeina o le tatou Fono.

Ia o se upu mulimuli lea a Satupaitea, soifua ma ia manuia.

FOFOGA FETALAI: Faafetai foi le lagolago mai i lau afioga i le sui usufono mamalu. Ia o le tatou galuega e tausoa faatasi, ia maua pea le toamalie ma le filemu o le tatou Maota. Malo foi le lagolago mai.

Ia o le taimi lenei Faleata 4, le sui usufono mamalu.

Tofa ALE VENA ALE: Faafetai i lau afioga i le Fofoga Fetalai, aua le avanoa ua momoli mai e taumafai atu ai se sao o lenei itumalo ia aua foi ia le tatou Tala Faaopoopo o le Tupe ua i lumamea nei o le Maota. Ia ma ua o tatou i ai faatasi ma lau afioga i luma o le Atua i lenei taeao, ua uma foi ona e toto le niu i le vatuaoi ma le tatou Matai Sili i le lagi. Ia tau ia ina ia liuliualo mai fofoga alofa o lo tatou Atua manumalo, auina mai Lona Agaga Paia e tautoaluaia tatou ia aua le tatou valaauliaina. O le mea la lea e momoli atu ai le agaga faafetai i lau afioga i le Fofoga Fetalai.

O paia o le tatou atunuu aua le tapuaiga i Aiga ma latou Tama, o Tama foi ma o latou Aiga, le Usoga ia Tumua ma Pule, Ituau aua oe Faleata ma ou Falenaatoiaata aua le Alataua, Aiga i le Tai ma le Vaa o Fonoti. Ia tulouna

ia, paia o le Maota o le Palemene o Samoa i lenei taeao. Ia ou te faatulou atu, aua le afifio o sui usufono mamalu uma o lenei Maota. Ua o tatou le faatasi ma le afioga i le Tamaitai Palemia, ia tatou tapuai ia ia, ia aua le apuluitofaga ma le falaefu le siiga gasegase a le Taitai o le tatou Malo, ia ia alofagia e le Atua, taulu, taulu Lona finagalo afuafu toe faafoisia lona soifua. Taitai mai ma le manuia, ia aua le tele o tatou galuega ua amata i lenei tausaga 2023.

O paia faalemalo aua le afioga i Le Ao Mamalu o le Malo, le afioga i le Tuiaana ae faapea foi ma le Masiofo, ia le afioga i le Sui o le Fono a Sui Tofia, afifio Taitai o le Faamasinoga, aua le afioga i le Faamasino Sili faapea foi le Peresetene o le Faamasinoga o Fanua ma Suafa. Afifio Alii ma Tamaitai o le Faamasinoga, Sui o Malo mai fafo, faapea foi le afifio o Faauluuluga o Matagaluega ma Faalapotopotoga Tumaoti o le tatou Malo. Ia le aufaipisinisi ma le tautuaina o le tatou atunuu, ia malo le soifua manuia i lenei taeao.

Ia lau afioga i le Fofoga Fetalai, ae le i taumafai atu se sao o lenei itumalo, ia o lea ua faafofoga le Maota i saunoaga a nai ou uso nei. Ae o lea ua ou musumusu atu i ai, tatou tapuaia ia le tatou mataupu lea ua i le Faamasinoga. Afai e alofagia e le Atua e manuia ia le tatou faamoemoe, ua tatou Tutoatasi, ia o lea e i ai ia nai vaega ia lea e omai, matua saili loa lea po o ai ia le tatou Taitai. Ia ae tatou tapuaia ia o tatou faiva, ia manuia ia le tatou faamoemoe, lea ua tuu atu i le Faamasinoga.

Lau afioga i le Fofoga Fetalai, o le mataupu lava lea e le toe tele se faamatalaga i le tatou vaalele. Ae o le sao o lenei itumalo i le mataupu lava lea, o lea ua aumai ia le finagalo o le tatou Faigamalo. O lea foi ua i ai le finagalo o le Faigamalo, e le toe aumaia le vaalele. Ia ona manatu ai lea, ua matua lagolagoina e lenei itumalo. Lafo pea i le Faigamalo o le aso, the Government of the Day is the boss. O le a le mea ua o latou tofa i ai, ia o lena e tatou te o i ai. O le mataupu muamua lena o le vaalele.

Lau afioga i le Fofoga Fetalai, o le mataupu lava lea i le Ofisa lea i le PSC, Public Service Commission. Ua mautinoa o functions uma nei sa tagofia e le Ofisa e pulea tagata faigaluega a le Malo, ua uma ona faamatuu atu i tua. Ua devolve uma functions uma nei i le tofiga o le aufaigaluega i Ofisa Sili o Pulega taitasi uma o le tatou Malo seivagana ua i ai se isi Act e toe suia ai, ae o lou na malamalama i ai. Ia seivagana ia le tofiga o le Pule Sili ma le Pule Lagolago o lea e i aao o le PSC. A o le tuuina atu i tua o tofiga o le aufaigaluega a le Malo, e pau le tulaga lea ua i ai i le PSC, o le monitoring ma latou mataitu lelei faiga o lo o faafae ai galuega. O le tofiaina o le aufaigaluega a le Malo ina ia atoatoa ma faatino lelei i taiala ua faamatuuina atu.

Ae e i ai la le itu lea lau afioga ua matauina, ua matauina le Ofisa lea o le PSC, mai i le amataga i lona faavaeina, sa tutoatasi. Sa fai lava e le Public Service Commission filifiliga ma faaiuga mo Pule Sili o Matagaluega. Ae

talū ai le Paeaiga lea na tea nei i le fia sefulu tausaga lea sa tulai mai ai ia le tatou Faigamalo, ua involve ia le Kapeneta. Ua pei ua atagia mai ai, ua na ona faatino e le PSC o le process lea o le faasalalauina o le avanoa ma le faatalatalanoaga, ia ona ave lea o le recommendation. Ia o lea na o tatou molimauina, mea sa tutupu i Nofoaiga na tuana'i atu nei. E ese le tagata na recommend atu, ae ese le tagata e tofi e le Kapeneta.

E i ai lou manatu e tataua ona tutoatasi le Ofisa lea. E tataua ona toe faafoi lea, ina ia manino ai ma aua ne i atagia ai le polokiki i totonu o tofiga o le aufaigaluega a le Malo. I lou lava lea manatu lau afioga, pe a tusa ai ma le finagalo. Ia aua e i ai le taimi i le Paeaiga lea na tea nei, na fai le Soa Komiti, taimi tonu lava lea na ou Komesina ai i le PSC. Na fai le Komiti e le Kapeneta ua amata ona o latou faatalatalanoa avanoa o Ofisa Sili. Se i silasila i ai i le mea na oo i ai. Na matou savalia ia le Alii Palemia ma tatolo i ai, lea na toe aveese ai le Soa Komiti lena ae toe aumai i lalo o le PSC.

O le manatu o lou ia sui usufono, e tataua ona tutoatasi ia le Ofisa lea aemaise o le tofiaina o Ofisa Sili ma Ofisa Lagolago o Matagaluega a le Malo. Ia tuu atu i tafatafa o le tatou Faigamalo, ia aua foi se tou faatofalaiga. E pei ona ou fai atu...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai e tulai atu e, manaia ia o le faalogologo i le saunoaga...

FOFOGA FETALAI: E i si se mea o finagalo ai lau afioga i le Sui Taitai?

Tofa Hon Lauofo Fonotoe Nuafesili Pierre Lauofo: E fia fesili i le sui usufono e fia malamalama ai i lana saunoaga. O lea ua saunoa e faatutoatasi ia le PSC, ia faapea foi faaiuga o Ofisa Sili ma Ofisa Lagolago. O lou finagalo aua le toe oo i le Kapeneta ia tofiga ia. Aua ne i toe faia e le Kapeneta, pe faamaonia mai e le Kapeneta, ae fai uma la i i le PSC le process atoa e pei ona e saunoa i ai. Ia ma fai ma faaiuga o le tofia o CEO, ACEO, o lou finagalo tonu lea... o lea e tau fia maua atu po o le sao lea?

FOFOGA FETALAI: Tulai mai le sui usufono mamalu o Faleata...

Tofa ALE VENA ALE: Lau afioga i le Fofoga Fetalai, e talosaga atu, aua le toe faalavelave se isi i lau lauga, tuu se i fai mai mulimuli. O lena e te silafia lelei lava Lauofo le agaga lea ua ou avatua. O lena tonu lava e te fai mai ai, ae e toe fesili foi? O le agaga lena o le faamoemoe o le sui usufono lena.

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai, e mafua ona ou fesili...

Tofa ALE VENA ALE: Ina ia tutoatasi le Ofisa lea.

FOFOGA FETALAI: Ia...

Tofa Hon Laufo Fonotoe Nuafesili Pierre Laufo: E fia malamalama, leaga e pei o le faiga lava lea o lea e faaauau i le taimi nei. O lea e afio mai ia le Sui Palemia ma le aiga Kapeneta, ae o lea foi la ou te fia manino tonu o lona finagalo po o... ou te le o fai atu e lelei pe leaga. E pau lava le mea o lou fia manino po o lona finagalo sao lea, faafetai.

FOFOGA FETALAI: Ia la ua tali mai o le mea tonu lava na e te fai atu ai la ua fai mai ai. Ia, faaauau le saunoaga...

Tofa ALE VENA ALE: Lau afioga i le Fofoga Fetalai, ia ou te le i toe tali atu i lau mataupu o le agaga tonu lava na...

FOFOGA FETALAI: Faaauau lau saunoaga o na e sao lau saunoaga.

Tofa ALE VENA ALE: O galuega ia faavaitaimi lau afioga i le Fofoga Fetalai, tele foi ina... tele faafitauli ua tulai mai i le auina atu o tatou tagata ia i galuega faavaitaimi. E pau lava le concern lea e tau tilotilo atu i ai, o le treat ina o tatou tagata. The way e treat ai e konekarate ia e faafaigaluegaina ia o tatou tagata.

E ese le o atu o tatou tagata e faafaigaluega, ae ese konekarate e fai i o. O lea e i ai tagata o lou itumalo lea sa o foi e molimauina ia... e tasi le fale e nonofo ai, \$150 i le aso e tasi. O le tele, e fai lava e latou ia latou meaai, ma mea uma lava. E tatau ona silasila le tatou Malo i konekarate e... vaai, e le mafai e vaega la e i o ona faafaigaluega ia tagata Niu Sila. E mumusu tagata e o e faigaluega aua e alu lava le tagata ia e nofo i lona fale ma usu mai e faigaluega. Ao le faaaogaina o tatou tagata, e le o lelei na vaai.

O le fautuaga i le tatou Malo, silasila lelei i le faafaigaluegaina o tatou tagata lea, ia ma se i mataitu lelei ia tagata e tatau ona o. O lea o le a tele ina talia ia tagata nei e i ai ia latou tomai e faigaluega ai i totonu o le tatou Malo. E tatau ona silasila lelei ia le tatou Malo i talosaga a i latou nei e fia malaga i galuega faavaitaimi lau afioga ma le faaaloalo lava.

Ia ona ou oo mai lea i le Poloketi lea o le miliona. Faafetai i lau afioga i le Minisita o Tupe, avea foi ma suitulaga i le afioga ia Leota Laki Sio, e tusa ai foi ma le afifio atu o le tatou Malo ma le afioga i le Minisita o Faatoaga, ia i le tatalaina foi o le Fono Faavae foi o le maota o lenei itumalo i le Aso Toonai ua tuanai atu.

A o le itu lea ou te fia tatalo atu ai i le Matagaluega, o le a ou le tautala lava i ni plans a isi itumalo. Ao le 5 year plan lea a Faleata Nu.4, i le faagasologa foi o lenei tausaga, ua i ai foi fautuaga ma tuualalo mai ia le afioaga, e tusa foi o nisi mataupu, ua faatulagaina e faaaoga ai ia tupe nei.

O lea la e tatalo atu ai i lau afioga i le Minisita, o lo o i ai se fetuunaiga, o le a toe tuuina mai lisi o talosaga, ina ia faataatia ese ai nisi o fuafuaga alualumamao o le Poloketi lea a Faleata Nu.4, ae faaofi i ai ni poloketi e ave i ai le faamuamua. E pei la o le matou faleaoga lea i Saina and Toamua Primary School. Ia ma nisi foi mataupu e talosagaina ai le Matagaluega, ina ne i oo atu foi ia le talosaga, ae e lelei o lea ua faaleo atu i le Maota lenei. O la foi e faafogafoga tapuai mai le afioga i le Minisita e ou le poloketi i atunuu e mamao, ia tatou talosia foi lana siiga gasegase ina ia toe taliu mai ma le manuia.

Ia, lau afioga i le Fofoga Fetalai, ona ou oo mai lea i le Tulafono lea. Ou te le toe tautala tele i ai lau afioga. Ua ou usitaia lau faatonuga o le mataupu foi lea ua tuuina atu i le Faamasinoga. A o le Tulafono lenei, the letter of the Law is in place. O lea ua taatia ia le Tulafono. Ua aveesea le Tulafono lea, lou aia, ou te alu ese ai ma le taimi e... but let's have a look at the spirit of the Law. O le a le agaga na fai ai le Tulafono?

Lau afioga i le Fofoga Fetalai, o atugaluga na o lenei sui usufono, leaga o lea ua molia ai o au nei ma nai uso nei i le Faamasinoga, ae e le o se Tulafono sa tatau na... Ua solia ai le tatou Tulafono Faavae. O le tatou Tulafono Faavae, our Constitution is the Supreme Law of this Nation lea ua aafia i le Tulafono lea.

Lau afioga i le Fofoga Fetalai, a fai o le auala lea ua faasino mai e le Atua, e lotea ai ia le mataupu lea, God help us to do it. E tatau ona aveese ia le Tulafono lea.

Tofa Mauu Siaosi Puepuemai (Vaa o Fonoti): Lau afioga i le Fofoga o le Fono...

FOFOGA FETALAI: Ia se i tulai mai ia le sui usufono o le Vaa o Fonoti, po o i ai se mea o fia faalavelave i lau saunoaga.

Tofa Mauu Siaosi Puepuemai: Ia ua se ligoligo le faafofoga a lau afioga ma le Maota, e tusa foi o le saunoaga matagofie a le sui usufono mamalu o Faleata.

Ia o le ala o le tulai, leaga o lea ua faalogologo atu ua lamalama faaiu le saunoaga a le sui usufono mamalu. Ia ae i ai le talitonuga, o lea e fia maua e lau afioga ma le Maota, aemaise foi le faafogafoga a le atunuu, po o ai o matou e taitai. E faamanino vaega ia. Ae o lea la ua saunoa pe fetalai le igoamatua, matou te faatalitali, e i ai le isi vaega ia. O lea la ou te fia fesili i le afioga i le sui usufono, o ai la le vaega lea? Ia ma le faaaloalo.

FOFOGA FETALAI: Ia, e i ai foi le manatu i le faafesili, ia talu ai o se vaega o le lauga a le Igoamatua. Ia ae manatu foi, ia a tatou auiliilia foi lea vaega, ia e manatua foi seiloga e toa 8 se vaega faatoa aloaia ae faaauau maia lau saunoaga Faleata Nu.4.

Tofa ALE VENA ALE: Lau afioga, ia leai, vaeatu foi si ou uso nei, atonu lava o la e toatele le vaega lea pe a manuia le mea lea, tatou mataitu pea.

Lau afioga i le Fofoga Fetalai, o lena le agaga. O lau ia vaaavaai i ai i le agaga na fai ai le Tulafono lea, it was meant to use the power of the Law, to stay in power. Na pau lava lena o le agaga na fai ai le Tulafono lea, which reflect power, conquer. O le agaga na na fai ai le Tulafono lea, e le o se Tulafono sa tatau ona faia i le Maota lena. This is the death of Parliament.

FOFOGA FETALAI: Ia....

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai...

Afioga Sulamanaia Fetaiai Tauiiili Tuivasa: Lau afioga i le Fofoga Fetalai, sina mea e fia faamalamalama...

FOFOGA FETALAI: Ia malie se i tulai mai le Sui Taitai o le Itu Agai, ia atonu o lea o le a maua atu ai se tala... se i saunoa lau afioga...

Tofa Hon Lauofo Fonotoe Nuafesili Pierre Lauofo: Leai o lea e tulai atu e faamanatu, aua o la e le o po se lilo i le silafia a lau afioga, ona o lea e taoto i luma o le Faamasinoga le mataupu o la e subjudice. Ae e pei o lea o le a agai i ai saunoaga e vailiili ia le Tulafono tonu lea, ae e pei ua see ese foi ma le tatou Tala i le Tupe.

A o saunoaga a le sui o le isi vaega, e pei o la e saunoa i o ma faapea lona aao i le Itu la. O le mea la lea, aua o latou la e toa 3, e na o le pau lava la o le vaega o lena Itu e leai ma nisi o lena Itu e toe o i ai.

FOFOGA FETALAI: Malie ia le Igoamatua, ia e manatu foi i le...

Afioga Sulamanaia Fetaiai Tauiiili Tuivasa: Lau afioga i le Fofoga Fetalai, e i ai sina mea e fia faamalamalama...

FOFOGA FETALAI: Ia se i tulai mai ia le sui usufono o Vaimauga Nu.1...

Afioga Sulamanaia Fetaiai Tauiliili Tuivasa: O le itumalo lenei o Vaimauga e uso ma Faleata. O lou tulai e pei ua tiga ou taliga ona o lea e i tua i i... ae o le agaga e popole ai le sui usufono lenei i le paiaga o lenei Maota, o lea ua saunoa ia le sui usufono mamalu i Tulafono ua pasia. E pau lava lena o lou popolega. O iinei sa fai ai ia tatou Tulafono lea ua taatia, ae lea ua toe saunoa ai pei ua aveese ai se agaga o le Tulafono ua pasia, e le tataua ona toe talanoaina. E pei o le agaga lena e fesoasoani atu ai lau afioga, ae o le Taitai ia Mauu o le toatolu o le vaega lea e saunoa mai ai po o ai nisi vaega, o o i le Vaega la lea e fai mai Mauu la e i ai tagata o le a omai i le latou vaega.

FOFOGA FETALAI: Ia, ua i ai foi le manatu o le Nofoa, ia ua faaeteete foi i le tulaga lea lau afioga i le sui usufono mamalu. E pei ona taua, o lo o i le Faamasinoga ia lenei mataupu, ua i ai foi le manatu ia, e le mafai foi ona o tatou soona oo tele i ai.

Ia ua oo mai le fautuaga a le Faigamalo, ia o lea lava e faafogafoga atu ia le Sui Palemia ma le Kapeneta, ia o lea ua manino lelei ia la lea tulaga ma le faamoemoe. Ia ae seivagana ua umi tele ia aua o lea ua o tatou oo i le taimi malolo, e toe umi tele le saunoaga po o...

Tofa ALE VENA ALE: Faafetai i lau afioga i le Fofoga Fetalai, o le mea sili lava lea, o lea ua ou taunuu i le agaga tonu na momoli atu ai le mataupu lea. Ua taliaina foi lau faatonuga lau afioga i le Fofoga Fetalai.

FOFOGA FETALAI: Faafetai, faafetai.

Tofa ALE VENA ALE: Ia, ou te momoli atu le faafetai tele lava, i nai ou uso a sui usufono, aua tou te popole fua i na mea ia. Aua tou te... o lea e tatou te malamalama uma lava i le taimi na o tatou i ai i le tatou vaega. Ioe, ae o le a ou le toe tautala i ai. E le iloa pe amata mai lava i o i le Sui Palemia, tagata e omai i i pe a amata atu iinei faasolo mai ai i i le aualii ia.

Ia ae ui o lea, ia lau afioga i le Fofoga Fetalai, ia ou te fia pai atu i lou itumalo, Faleata Nu.4. I le Afifio o Ale ma Ulu ma oulua Aiga ma le Gafa o Aatoe ma le Itulua o Sa Tunumafono, lau Tofa Vaaulu na Falelima i ai Aiga e Toafa o Faleata, ia faapea foi lau Afioaga Paletaoga, o le Alo o le Tuitoga. Alaalatai Lauaki ma Motuopuaa ma Falesataalaua ma le tatou nuu o Saina, ia o lea ua uma ona fai ia le tatou faaleleiga.

Faafetai pe a fai e leai ia se tatou palota, pe a faapea e taunuu ia le tatou taunuuga, ia ae o lo o matua 1 million percent lou talitonuga, malepe i i le Tulafono lea. Manuia tele le Fonousu a Samoa, faafetai.

FOFOGA FETALAI: Ia, malo faafetai. Faafetai foi i lau afioga i le igoamatua le lagolagomai i le Nofoa. Ia ou te taumafai atu lava ia maua pea le toamalie ma le filemu o le tatou Maota, ia aemaise foi o le faafogafoga mai a lo tatou atunuu. O le mea lea, malo faafetai.

Ia ua i ai le manatu o lea ua faalepa le safolau i tuleiga ma saunoaga o lenei aso. O lea ua o tatou tau mai i le taunuuga o le tatou galuega sa faatulaga mo le aso. Ae o le a maua lava ia avanoa i luma e faaauau ai ia tatou saunoaga i le Tatou Tala Faaopoopo o Tupe e pei ona lauililiuina nei. Ae faamalo le usufono i lenei aso. E momoli atu ai foi le faafetai mo tuleiga ma saunoaga i lenei aso, aemaise foi o le lagolagosua o le tatou Maota mo le taumafaiga o le tatou galuega.

E i ai le lagona o le Fofoga Fetalai, e leai se mea o le a faanatinati ai le faasologa o le tatou galuega. E fai o le tatou Maota nei, ae e le o malolo foi le Faigamalo i ana matafaioi aua atinae o lo o faagasolo mo le atunuu o lo o faatali mai. E lelei ona o tatou sailiili malosi, ona manatu lea, ua tatau ona fai ia se tatou malologa. Talosia i le alofa o le Atua le aso a taeao, momoli atu i ai lo outou soifua ma le ola, toe faaauau ai ia le tatou galuega.

Faamalo le usufono, faafetai foi mo le tapuaiga a si o tatou atunuu. Ae tatou te le i tolopo, ou te talosaga atu i le sui usufono mo Aana Alofi Nu.1, se i saunia ia se tatou tatalo e faamaea ai ia le tatou galuega o lenei aso.

Na tolopo Taualumaga a le Fono Aoaofa Faitulafono i le itula e 1:04 i le afiafi seia aulia le Aso Faraile 20 o Ianuari 2023 i le itula 9:30 i le taeao.